

四明談助目錄

第十本南號四

卷二十一

錫山南湖脉附 記南湖昌黎泉起至蔣園廟等處古蹟提綱

昌黎泉述 聞志附 新按錄 勾餘土音詩

趙侍郎水閣述 月湖丈尺圖附 新按 魏相國園述 湖語

陳參議小築述 族望表錄 參議允平傳并 詩又 張玉田詞

勾餘土音詩

黃文潔公寓日湖錄 文潔震傳 湖語 勾餘土音詩

威果三十營述 寶慶志 元廣盈倉述 至正志錢志

藕尾港述 湖語并 註 宋制置使司糴南倉述 敬止錄

四明談助 卷二十一

目一

倉基陳氏述 前後族望表附 新按列 正言禾 學士曦 太

常槩 學士大方附 誣戮王惟忠事 御史濂 太僕沂

中允之龍諸傳末 附 別族都司民俊傳

余相國第述 聞志并 族望表附 新按錄 太保有丁 明經經

訓 水部長宏傳

飛蓋園附 新按錄 陳公顛竹枝詞 胡翰林鑑寓余相國第

余相國第二府附 新按并 後業主段提督秀林傳

水月橋述 日湖丈尺圖附 新按

沈相國第二府述 族望表附 新按錄 太師一貫傳并 傳後論

畫像記 全謝山咏暢園詩 尚寶泰鴻 馬湖泰泳

太常泰藩 刑部延禧 尚寶光融 處士光乘諸傳

採蓮橋 述 聞志 又 日湖丈尺圖

薛氏義門 述 嘉靖志聞志 并 前後族望表 鮎埼亭集義門

瑞室記 勾餘土音詩 錄 處士唐 知州朋龜 安撫居

實 并 贈妓詩 刑部揚祖 提學明道 知縣觀 司稅

敬 紀善服耘 知州穰 孝子淋 同知治 山人岡

高士珩諸傳 附 薛氏世風刪序 敬止錄山人逸事記

句餘土音咏高士詩

葛觀察城居第 范尙書祠 錄 宋尚書楷傳 黃侍郎第

細湖 採 鮎埼亭集 競渡湖 述 乾道圖經 捧花橋 述 全謝

山湖語

日湖世家 述 族望表 附 新按 列 贖菴禮 司諫冕 禮部濂

四明談助 卷二十一 目二

訓導序 處士普 文學人龍 處士于度 孝廉海諸

公并連傳

南水門裏河 述 敬止錄 聚福廟 述 郡邑志 并 敬止錄 附 新

按

蔣園 錄 王亘遊園詩 鮎埼亭集蔣園考 蔣園廟碑記

句餘土音金紫公園詩 記曹泰宇授徒蔣園事

卷二十二

錫山雲石脉 附 記雲石起西行轉北至旌忠廟古蹟提綱

雲石 述 嘉靖志聞志錢志 採 郭中立雲石歌范香谷雲石詩

靈應廟乾 述 道圖經聞志 附 鮎埼亭集考正廟議畧

甬水菴 述 聞志 又 湖語 并 注 晝錦坊 述 湖語注

連桂坊蔣氏述 族望表又 鮎埼亭集宗派辨列 摩訶宗霸

金紫浚明 閣學峴 將作曉諸傳并 謝山湖語

宣少師賜第附 新按述 湖語并 註 釋褐狀元坊述 寶慶志

寶雲巷李氏錄 知縣芳馨 文學應運 教授凱 教諭琦

傳

寶雲寺述 聞志錄 法師義通傳并 梁公狄寓寺記又 詩

戒香菴述 聞志又 敬止錄銅像緣記

鎮明嶺述 聞志附 山脉辨錄 袁菊村詩 鎮明菴述 敬止錄

正學祠述 聞志錄 楊文元簡舒文靖璘并 附傳

擬呂忠公祠錄 鮎埼亭集祠堂記又 按察和傳王伯厚七觀

擬慶歷五先生書院錄 鮎埼亭集書院記

四明談助

卷二十二

目三

元至正末縣治述 聞志

旌忠廟附 新按述 郡司馬黃定文碑記又 書廟碑後列 神位

次序錄附 黃孝廉桐孫撰祭正室錢張二公文 後屋中

室殉難諸公文 後屋左室守節諸老文 後屋右室全

謝山先生文錄 里族未詳諸公任吏部斗樞 谷通政文

光 魏參軍耕 舒參軍天福 徐戶部振奇 方虞部

陞傳後 附 石刻陳恭潔公暨 錢張二公小影遺墨 蕭山

王進士宗炎撰祔祀全翰林碑記

四明談助卷二十一

錫山脉從老龍灣進城自西至東結為月湖十洲老  
上茲再從王家墩楊家花園廟前過河至冷靜街其分水南  
行出桂芳橋入日湖北行出大廟橋小尚書橋南社壇橋韓  
家橋湖橋九曲巷橋後所營橋至水則亭入平橋河冷靜街  
之南有昌黎泉趙侍郎水閣陳參議西麓黃文潔公寓亭威  
果三十營元廣盈倉宋制置使南倉南湖陳氏明余相國第  
飛蓋園沈相國第范公祠街北有薛氏義門葛觀察第黃侍  
郎第競渡湖日湖世家蔣園廟等蹟備錄于左

昌黎泉

縣治南二里南倉基內宋紹興間郡守韓仲通建亭其上故

四明談助

卷二十一

一

名聞志泉在余相國府之左沈相國府之右池口八角旱時池

底復有小井可汲係元廣盈倉地聞志誤云在南倉基內

句餘土音賦韓太守昌黎泉

詩話宋時吾鄉之酒務在偃月堤而南湖之庫在是

白龍神宮深蟄處太守于此釀廉泉舊聞棠陰古亭茂更喜

酒坊相參連唐殷太守有棠陰亭宋時為官酒庫泉香酒冽多樂事太守來看

競渡船其樂不減藏春園湖西官酒務有藏春園蓮花漏下太守歸白

龍竊出湖上眠太守重作蓮漏風流轉盼成昨夢威果營塵漲滿天

沙蟲猿鶴亦一瞬胡瞻有禾三百廛宋季為威果第三十營元為廣盈倉而泉遂塞

何人好事追遺躅昌黎之勝反乎復誰其云者兩黃鵠

趙侍郎水閣



宋時嘉定日湖丈尺圖云趙侍郎水閣取南城下七丈九尺蓋吏部侍郎趙粹中所居侍郎從密州徙居于鄞嘗進恢復等策孝宗亟賞之一歲九遷由秘書郎至吏部侍郎其子遵以父恩當得官每恨祿不及親期至皆不赴隱于茅山事俱詳茅山本傳

### 魏相國園

魏文節公亦有園在湖上未詳其處湖語云乃若南渡以還誰爲巨擘我思兩公折衝使節焦山丞相參預密勿實佐中興未竟其烈晚愛詩寮雪窻妙筆註云魏文節公杞陳文定公槩皆使金不屈世但知魏事文節于闈中識雪窻張武子之文晚年遂訂爲詩友

### 四明談助

#### 卷二十一

二

陳文定公傳見後魏文節張雪窻二傳見仲夏碧溪菴下陳參議南湖小築

甬上族望表南湖陳氏西麓先生允平之詩詞晚宋之巨子也而鄞人無道之今補列之爲一望

### 陳參議允平

字君衡少師居仁之孫清敏公卓弟子也德祐時授沿海制置司參議官帝昺祥興元年參議與蘓劉義書期九月以兵船下慶元當內應爲怨家所訐且言禮部尚書高衡孫等三十餘人皆聯署時張洪範督師南下遣招討使王世強圍捕同官袁洪解之得釋見清容居士集後以人才徵至北都不受官放還善詩詞與吳文英翁元龍齊名見宋詩紀事文

懿公居仁自閩來居梅江清敏公卓築世綸堂于梅墟見世綸堂陳氏本傳

西麓有賀伯父大資休致詩云不戀清時白玉璫便將身世寄滄浪三朝元老黃樞閣四海閒人綠野堂楚楚菁蘭秋帶雨蕭蕭寒菊晚宜霜擬成東甬耆英社賸樂壺天日月長大資者資政殿大學士也玩詩意似曾登樞密者疑卽清敏公卓也

日湖訪古錄

張玉田拜陳西麓墓詞云句章城郭問十年往事幾回歸宦歎貞元朝士無多又日冷湖陰柳邊門鑰向北來時無處認江南花落縱荷衣未改病損茂陵終自蕭索山中故人去却但碑寒峴首舊京如昨悵二喬空老春深正歌斷

四明談助

卷二十一

三

簾空草昏銅雀楚魄難招被萬疊間雲迷著料應是聽風聽雨朗吟夜壑自注山中樓扁萬疊雲

山中白雲詞

湖語云日湖樵唱領袖詞家杜門桑海晚節尤嘉可憐用晦以發天葩

陳參議允平

句餘土音賦陳參議西麓

詩話西麓詩詞甲于晚宋而舊志不爲立傳惟清容作其父處州墓文中載西麓受告密之禍一節則固遺民之不忘故國者也予取其集攷之乃知爲湖上人

少師老孫子小築幽居成西麓玉雪才華分外清應笑四靈尙劣薄更有絕技工慢詞梅花春晚驚重幄一官幕府曾幾時飛章告變遭刑僂故國故君良懸懸以此遭尤亦所欲幸

從鯨背脫餘生沈冥從此晦空谷萬疊雲來寫素心彩毫落  
處秋水綠夕陽西下清泠泠如聞樵唱出湖曲日湖樵唱參  
議集名萬疊

雲參議  
樓名

### 黃又潔公寓日湖

寓公黃文潔先生震字東發慈谿人累官浙東提舉遷宗正  
少卿不拜有別業在日湖德祐初避地同谷不復入城市  
城中圖籍器物盡爲人取去勿問也日惟一食仰天歌祈  
速死公爲人清介自持時陸學盛傳公獨崇朱學及卒門  
人私謚曰文潔先生著日抄一宋史兼百卷湖語云更增  
賢哲來爲寓公日抄一編儒苑箕弓東發黃先生宋未  
亡時寓居湖上  
朱子于春秋禮記無成書黃東發取二經全爲之集解其

### 四明談助

#### 卷二十一

四

義甚精蓋有志補朱子之未備者耳且不欲顯附于日鈔  
中其後程端學有春秋本義陳澹有禮記集說皆不能有  
以過之也永樂初修五經大全諸儒皆未見日鈔故一無

所取姚福清  
溪暇筆

### 句餘土音賦黃文潔公寓亭

詩話文潔避地仗錫見剡源作墓表避地同谷見臯羽詩  
其寓日湖見延祐慶元志

古窯斥鹵區文潔居慈  
水之古窯

天生蓋世豪乾淳正學誰能紹乃以

露纂兼雪鈔諸儒墜言肉貫弗獨奉建安爲斗杓霜松風柏  
凜歲寒肯爲宰相兄子撓歸田來湖上誓將老衡茅會逢厄  
運丁陽九渡江北騎驚飛濤行都廟社且塗地何況區區一

寓寮圖書法物成敝屣如醉如嚙歌黍苗文潔避地出行南  
遷仗錫東同谷一枝何處奠山鷓出門輒有礙誰復謂天高  
日惟一餐祈速死誰其知者聞謝翱當年湖上早雲散其暨  
于今益已遙誰知百世後有客茫茫賦大招

### 威果三十營

在城西南隅採蓮橋西至正續志

宋初收天下勁卒列營京畿征伐悉從中遣故惟三司卒稱

禁軍州郡止有廂軍廂乃藩鎮舊名如日左右鎮廂第幾廂蓋部分之別也守三邊屯

戍卒或升禁軍重之也嘉祐四年詔置就糧禁軍兩指揮各

四百人以威果爲名排次自荆南至明州爲威果第三十指

揮額五百一十人除捕盜外不許他役營在西南廂順成坊北又爲威

### 四明談助

#### 卷二十一

五

果第五十五指揮額四百人不隸將舊營以居養坊爲之在子城東南嘉定十二年

火移于忠順官寨內新縣學乃其舊址自後大郡有禁軍矣寶慶志

### 元廣盈倉

在西南隅採蓮橋西係宋威果三十營基至正續志宋昌黎泉今

稱八角井者在其地

### 藕尾港

湖語何來細湖別成遙澣溯流而會藕尾如注誰云不掉凌  
風軒舉註云南湖採蓮橋一帶稱細湖細湖之西有港曰藕  
尾

### 宋制置使司糴南倉

倉以南名別西倉也西倉已儲粟二萬一千餘石淳祐四年

制帥殿撰趙綸以官地易延慶寺西蔬圃建南倉儲五年以後續添之數規模視西倉益闋詳見提督官司戶黃縉所具條約

敬止錄

今陳氏所居卽其地

倉基陳氏

明都御史陳濂建第于倉基其先世文介公禾爲左正言傳學士曦太常概俱有直聲稱忠諫里陳氏

甬上族望表忠諫里陳氏文介公禾第一學上曦藏書第二太常槩出使有聲第三終宋之世陳氏克昌而大方微減家聲惜矣凡三望 甬上後族望表南湖陳氏宋忠諫文介公禾之後也見前表漕撫都御史濂殉難御史諡恭愍良謨二望 又云魯南陳氏行太僕卿沂一望今居金陵

四明談助

卷二十一

六

左正言陳文介公禾

字秀實舉元符三年進士擢監察御史劾奏蔡京子僚何執中壻葵芝之罪皆罷之遷左正言時童貫擅權與黃經臣胥用事御史中丞盧航表裡爲奸禾抗疏劾貫復劾經臣言黜幽陟明天子大權奈何使宦寺得與願亟竄之遠方論奏未終上拂衣起禾引上衣請畢其說衣裾落上曰正言碎朕衣矣禾曰陛下不惜碎衣臣豈惜碎首以報陛下言愈切上變色曰卿能如此朕復何憂內侍請上易衣上却之曰留以旌直臣後童貫等相率譖之帝曰此人素如此汝不能容耶久之知舒州命下而卒贈中大夫謚文介禾性不苟合立朝挺挺有風操

宋史

著易解春秋解語孟

解共三十八卷孝宗朝史浩侍經筵上其書聞志

文介公父謚博學教子有法嘉祐八年登第兄秉以八行舉政和八年第官壽春府教授世喜藏書謚之亡舒龍圖亶挽章有曰塵埃滿匣空鳴劍風雨歸舟只載書文介之子曦復爲藏書記告其後俾勿墜素業寶慶志文介有別業在東錢湖二靈山中號二靈山房

### 陳學士曦

字元和文介之子也紹興八年進士知休寧縣政尙清儉守法不阿改國子學正高宗幸太學召曦曰今學者言卿講說訓導可以爲師朕欲觀卿之道至于有成對曰陛下若復興太學此盛德事也帝悅擢給事中居六載彈劾不

### 四明談助

#### 卷二十一

七

避權要帝嘗謂侍臣曰惟陳曦言事最誠實自知制誥知

濠州政稱第一召拜翰林學士卒成化志

太常寺卿陳文定公槩陳少師宅在開元寺西

字少儀文介曾孫慶元五年進士知泰和縣奏罷魚鹽課陞左正言使金不屈時婺州處士呂祖泰上疏乞斬韓侂胄被繫概抗疏救之得釋官至太常寺卿致仕謚文定曦曾孫大震元孫伯鼎俱登翰林時人稱爲祖孫三學士聞志

湖語云崢崢少師清門所出黨論方興抗章申揭由來骨鯁罔愆遺笏文定救呂祖泰黨禍時以爲有文介之風

學士曾孫大方紹定五年進士大震嘉熙二年進士

附聞志王惟忠傳

王惟忠字肖尊歷官知閩州兼利州西路安撫時余玠帥蜀委惟忠治財賦府庫充足值同郡昌國余晦代玠晦素無譽望惟忠心輕之呼其小字曰余再五來也晦聞之怒因誣奏惟忠潛通北國逮下大理勘官鄞人陳大方煅煉成獄遂棄惟忠于布籍其家臨刑謂大方曰吾訴于天帝血上流而色不變未幾大方恍惚若見惟忠遂病死同邑秘閣張卽之里居聞惟忠死致書制使卹其家屬且令從子娶其孤女後得改葬并復金壇田宋史附惟忠于卽之傳末所以義卽之也余晦爲天錫從子似不足惜獨惜陳大方爲文介公禾之元孫同附致鄉人于死不惟有愧祖父其視張榘察之待梓里爲何如哉

癸辛雜識云王閩州臨刑時七揮刃不殊血逆流後二年大方白日有見恐甚遂設醮以謝過未幾暴卒而余晦患瘰癧繞項墜首死景定元年以中書舍人常挺言給還首領以禮改葬

副都御史陳公濂

字德清宋文介公禾之後也正統乙丑進士授南刑部主事善斷獄一如宿吏由員外郎出爲廣東按察副使巡視海道海故多大盜倚風濤出沒復阻山其勢熾甚公身冒矢石出奇兵與戰值雷電大作公奮擊之賊迷躓自相殺所俘斬無算海南遂平遷布政使未幾擢右副都御史卽撫其地又命總督漕運撫畿內再命督漕卒於道公爲人

風儀秀整美髭髯中懷坦易不爲蘄絕之行在嶺外最久  
政平事簡上下安之詔賜祭葬錄其子蘖爲國子生者舊傳

後官貴溪知縣聞志

行太僕卿陳石亭先生沂

字魯南先世徵入太醫院遂居南京先生體短疎眉目風  
神朗秀五歲能屬對八歲能摩畫十歲能詩十二歲作孔  
墨解赤寶山賦傳誦人口時海內名公官留都者並引先  
生爲忘年交及正德丁丑成進士改庶吉士年已四十有  
八爲夙名士矣授編修進侍講所撰進講章善寓諷諫上  
心識其名以見忤永嘉出爲江西叅議多惠政尋改山西  
行太僕卿力請老歸里先生性篤孝友事二親死生情文  
脩極鄉閭有急匍匐救之惟恐後晚年築遂初齋於家園  
杜門撰述絕意世事者舊傳石亭先生有別業在大涵山名  
拘墟館

石亭先生著述書目

南畿志六十四卷 金陵世紀四卷 金陵古今圖考一

卷 山東通志 游名山錄四卷 獻花巖志 翰林志

一卷 陳東盡忠錄八卷 石亭雜錄一冊分四種 拘墟寤

言五卷 畜德錄 誨似錄 拘墟館集五卷 續拘墟

集二卷 拘墟詩談一卷 石亭文集十二卷 遂初齋

集 紀遊集五卷 古律手鈔

右中允陳公之龍

字士燮號渤海萬歷乙未進士歷官右中允公爲人簡易有東晉風味前此吾鄉袁文榮公全兗洲學士在翰林過自引重待門生多不以禮公心非之及分考出就邸卽戒門者本房新進士造謁立爲通無使候門下預爲大被與諸門生飲極驩卽聯被同寢其簡脫若此一時稱之者舊傳著水月山房集渤海集錢志殉難御史陳恭潔公良謨

御史殉難後南都贈太僕卿諡恭愍 本朝賜諡恭潔卽於公之別業娑羅園爲祠以祀之傳見娑羅園居第同族 坊嘉靖癸卯舉人廬江知縣 圭嘉靖辛酉舉人益陽知縣 之京萬歷甲午舉人知縣見薛仞鄞獻表

四明談助

卷二十一

十

又陳氏

陳都司民俊字公籲本名諸生恃才豪放爲忌者所中學使至郡錄其在高等而更以行黜遂棄家入長安中武進士官陝西都司復以忤事罷歸所著有木阜寶尊二集 吾鄉湖上七橋柳汀花嶼諸大家樓榭俱在其中公籲嘗作湖上竹枝詞爲里中所傳今亂後風景遂不可復見每讀其詩輒低徊久之者舊傳

余相國第

在縣治南藕尾漕大學士余有丁所居聞志相國父通判永麟居東門內四港橋鄞獻表稱小江橋余氏後相國建第於此大門上舊有天朝師相直額雍正間與正廳並燬於火

甬上族望表五柳余氏大學士謚文敏有丁一望  
太保余文敏公有丁

字丙仲號同麓父永麟嘉靖戊子舉人授崑山教諭擢蘇州府通判公生而秀異強記敏悟就學輒能文從其父於崑山學舍父未任蘓州而卒持喪歸哭泣無時病目眩者三歲家益落然志願獨遠營葬父地使當前宏爽可以列儀制聞志既得地在同谷因號同麓子嘉靖壬戌中進士殿試第三授翰林編修初公童時遊崑山求執經於震川歸先生有光之門先生屏不許至是公充會試同考手一卷曰是必歸先生文也失吾不收先生老公車矣及發卷果歸先生海內文章爲之一變歷遷吏部左侍郎掌詹事府

江陵新歿以禮部尙書兼大學士入閣辦事公枋國在重臣當軸後意在休息之浙兵爲亂少司馬張公佳允出撫浙造公問計公曰此窮獸也不善處之且致死故將徐景星識軍情有定變才但挾之以往指揮可定矣浙中竟平及江陵事敗論者搜剔不已至有摘高啓愚科場試題舜禹之事以搖上心太宰楊公持不可言者譁然閣臣亦俱引去公獨入直密疏曰言官可任孰與諸大臣今以一言官故而使諸大臣求罷非盛世事惟陛下降手札慰留以示殷勤使大臣得安庶人心定國事明也上卽從公言人謂此回天力也未幾以疾卒於京邸入相不及三年公素達生有高世之志喜訪故鄉佳山水初以南學士乞假歸

里買山東湖中薙草得一古洞口以杖叩之音鏗然爲蕪  
火入洞則訝然乳四垂千年伏翼觸烟而出乃披道抗邱  
爲湖居更依洞門築一臺受湖光澹蕩時泛小舟往來起  
白鷗莊在水口每四方名士至相與遊湖山佳處旣載肴  
觴兼攜絲竹唱咏傳一時江左風流自許謝安王儉者舊傳  
著文敏公集十五卷聞志東湖別業曰五柳莊記見東湖下  
子廷槐刑部郎中廷椿中書舍人廷檟鶴慶府知府孫詩訓知府經訓傳見  
繩訓刑部郎中維訓刑部郎中曾孫長粲中書舍人長宏傳見

### 余明經經訓

字生超文敏公之孫也少有異才年十四以明經貢於鄉  
至京師與屠田叔蔡子行二先生同賦詩唱酬蔡屠俱詞

### 四明談助

#### 卷二十一

十二

家宿老生超年少一日而與齊名今所傳薊門遊草是也  
未幾歸里門生超旣負才誕放娶妻如許允婦婦死爲其  
家所辱因客死吳下蘭摧玉折識者哀之者舊傳

### 余水部長宏

字任可號心齋文敏公曾孫以蔭授中書舍人轉餉大同  
歸擢南京都水司主事恭謹好義甲申之後棄官樂道時  
與故人納子遨遊山水間賑貧卹困不遺餘力聞志順治癸  
巳寧郡大饑公鬻遺產作粥糜以飼饑者立留仁社以惠  
後人一遵朱子社倉斂散之法全活者甚衆子紹昌嗜古  
能文蜚聲太學著有寄傲樓草三補者舊傳

### 飛蓋園

余相國公子築園于府前曰飛蓋左瀕倉基漕右瀕藕尾港池亭花木極一時之盛數十年前菜圃中尙有遺跡可稽今則賃人厝柩幾成義冢地矣昔聞余相國有女歸于沈相國爲媳沈相家欲余公子以飛蓋園隨嫁公子不允一日沈氏會親將公子誘至一室剝衣弔打幾至殞命此事相國後人諸生仲年所說

陳公顛日湖竹枝詞

名園遙擬日湖頭飛蓋曾隨公子遊會說內祠先相國不知

太傅本風流

余相國文  
敏公詞

胡翰林寓居

在余相國舊第後進東畔翰林曾祖帝佐始居于此以造酒

四明談助

卷二十一

十三

爲業人稱長者祖月如諸生舉止端方酷信道教與張象厓林樹滋諸前輩友善供奉呂祖日記功過道行爲世所稱父士桂字冠金恂恂孝友始因善病拜樹滋爲父冒林姓應試入學後復姓未幾卒胡氏三世忠厚至翰林而始大其門翰林名鑑字再谷姿性穎敏自幼持重簡默無待嚴師訓迪而學自日進嘉慶戊寅舉於鄉庚辰成進士現任翰林院編修學業功名未有艾也

余相國第二府

門臨浮木橋河在陳中丞第之左延慶寺水月橋之右相國子孫官爵事蹟俱詳前傳後漸衰微康熙間子孫退居後堂將正宅出售于定海總兵藍理乾隆間藍轉售於段提督秀

林今段又哀歇屢易主矣

段提督秀林字沛年陝西榆林人年十八從軍青海爲前鋒  
雍正五年分發浙江由千總歷陞浙江提督又調古北口  
提督扈從熱河年逾七十尙能跨鞍彎弧爲將士先乾隆  
四十一年金川凱旋將軍至各官郊迎 特諭免戎服佩  
刀又預紫光閣 賜宴尋調湖廣提督次年卒秀林在浙  
最久以無家可歸陳請入籍於鄞遂爲鄞人云

錢志

水月橋

在延慶寺西南湖水通捧花橋一帶俱從水月橋入舊稱延  
慶寺橋曰湖丈尺圖云浮木橋取延慶寺橋二丈九尺

沈相國第二府

四明談助

卷二十一

十四

沈相國廣濟橋西故第 國初時改爲提督署其第二府在  
採蓮橋西今亦僅存中進爲他姓聚居宅後通冷靜街  
甬上族望表南湖沈氏亦自櫟社來然非勾章之族也大學  
士謚文恭一貫左春坊左諭德延嘉二望 延嘉傳見王家  
墩第

太師沈文恭公一貫

字肩吾號蛟門隆慶二年進士選庶吉士授檢討充日講  
官進講高宗諒陰洪手曰托孤寄命必忠貞不二心之臣  
乃可使百官總己以聽苟非其人不若躬親聽覽之爲孝  
也張江陵以爲刺已頗憾之江陵卒始遷左中允萬歷二  
十二年以禮部尚書兼東閣大學士朝議許日本封貢文

恭慮貢道出寧波爲鄉郡患極陳其害貢議乃止時國本未定廷臣爭十餘年不決二十九年貴妃弟鄭國泰迫羣議詩冊立冠婚並行又有欲先冠婚後冊立者文恭不可曰不正名而苟成事是降儲君爲諸王也帝意亦頗悟命卽日舉行旣而帝復悔令改期文恭封還詔書言萬死不取奉詔帝乃止十月望冊立禮成時論頗稱之尋進太子太保戶部尚書武英殿大學士帝久不視朝上下否隔甚文恭雖小有救正大率依違其間物望漸減黨論漸興浙人與公論忤由文恭始文恭輔政十有三年當國者四年積不爲公論所與彈劾日衆因謝病不出三十四年與沈鯉同時罷而獨得溫旨言者追劾之不已家居十年卒贈

四明談助

卷二十一

十五

太傅謚文恭

詳見明史本傳

公少與余君房同研席族父嘉則先生名最重公嚴事之稱爲句章公嘗曰吾學文於君房學詩於句章公門中指授同學切磨俱深得其傳而公詩更爲獨絕每當老氣橫厲顧盼自奇斯誠魁然一世之豪也前輩謂如幽燕老將氣味沉雄足冠詞家之首此可與論詩矣

甬上耆舊傳

沈文恭著述書目

易學十二卷 詩經纂註四卷 叙倭入東南事一卷

彙編史論 道德經解二卷 老莊通 陳善集六卷

敬事草十九卷 喙鳴文集二十一卷 喙鳴詩集十八

卷 經世宏詞十五卷

沈文恭公畫像記 結埼亭集

康熙己未之開史局也秉筆諸公欲痛抑沈文恭公以爲國之禍由於黨部黨部之禍始自文恭時吾里中預史事萬徵君管村頗平反之以爲由其後而言一變而爲崔魏再變而爲溫薛楊陳三變而爲馬阮清流屏盡載胥及溺而溫則文恭之門下也東林諸子所以尤憾文恭然此乃流極之運未可盡歸之一人蓋黨部之起長洲太倉已先發難太倉最黠長洲次之文恭不若太倉之巧而深于長洲至其擠歸德逐江夏文恭之謗遂在長洲太倉之上若溯其源豈自文恭始乎管村之說蓋亦天下之公言非有私於鄉曲然是夕也管村夢有珥貂搢笏藍袍投刺稱謝

四明談助

卷二十一

十六

者則文恭也覺而異之已而管村出宰五河得罪放還病廢於家忘其夢矣一日策杖偶過沈氏問其後人曰聞先太師畫像最多願得觀之其後人曰諾因以簏至管村隨手拈得一幅珥貂搢笏藍袍疇昔夢中所見者也管村爲之愕然因以語之先公共爲太息嗟乎枋臣當國不畏天下之清議而身後不能不倦倦於此何見事之晚乎無他生前炙手之熱已成蓋旦晝斧斤之梏也身後游魂冰山漸滅蓋夜氣之清明也夫至於旣死而夜氣始悟而已莫可追矣世之有鑒于此者其急提醒及時之夜氣而無待于旣死之乞靈焉庶乎其可也適有以文恭小影至者因記其語於後

沈相國有暢園在南城見鮎埼亭詩集又有陳園在北城見屠辰州本峻空言註

### 全謝山沈相公暢園詩

尚寶好兄弟超然謝黨論嘉名分襖帖小築傍空門文恭諸子

當天啓時俱能自拔于浙人衣鉢之外不求進取其放懷詩酒亦可尚也園中題署皆取襖帖中語尚有懷

寧墨能汙貞士魂風騷今雨散蔓草滿城根阮尚書大鉞與文舍人啓

美嘗偕寓茲園唱和阮文臭味不同而以絲竹之好相連綴詳見暢園志中

### 沈尙寶泰鴻

字雲將相國一貫之子也少有麗才能詩工書法翩翩自喜思以科名見相國抑之不使應諸生試始強就尚寶司丞非其志也家居益與屠長卿田叔汪長文諸先生及湖

## 四明談助

### 卷二十一

十七

南詩僧相唱酬徜徉山水間李子年先生以才高忤時被黜雲將與長卿先生力辨諸當事因得白人以此益稱之雲將卒相國尚在所著有閒止樓集耆舊傳

### 沈馬湖泰泳

字鱗游一字聖水文恭公仲子蔭授中書舍人晉屯田郎逆奄專權內外要地皆設兼督崔文昇總戶工二部氣勢烜赫舊例屬司晉謁名刺用官銜相見用交拜禮崔欲以堂官自居諸司莫敢爭公謂丈夫所重者此腰耳竟以長揖見文昇亦爲改容出守馬湖有循吏聲續耆舊傳

### 沈太常泰藩

字長世文恭公季子美丰姿恂恂儒雅人不識其爲貴公

子以蔭授尚寶丞歷任太常卿甲申後以悲憤成疾卒著有符司草清署閒吟子延統字御三國亡不仕續者舊傳

### 沈刑部延禧

字孔皆尚寶泰鴻次子少時師事士瑋吳先生卽精對句嗣任舍人逾年遷刑部主事罷官旋里閉戶讀書著有會

心語

續者舊傳

### 沈尚寶光融

字冲旨一字文竹石阡守延賞長子性沉靜寡言笑以文恭蔭受尚寶丞父卒石阡往扶櫬中途聞二月十九之變擗踊號哭黝髯而出皓髮而歸東江之役盡出其家貲以應丙戌以後年僅強仕憤悶而卒著有劬募集栩吟哀吟

### 四明談助

#### 卷二十一

十八

行世

續者舊傳

光定泰藩孫康熙四十五年丙戌科進士知縣

### 沈處士光乘

字惠吉主事孔皆少子天性孝友執親喪哀毀骨立奉諸兄如所生老益嗜學督子甚嚴人謂君衰年止一子何過督曰正惟一子不可使不肖得年七十有八子瑄康熙乙酉舉人三補者舊傳相國後裔履武食餼邑庠貢成均道寬順天籍舉人嘉慶庚辰科進士知縣敦僑食餼郡庠

### 採蓮橋

東達塔兒橋路西抵大街

聞志

日湖丈尺圖云延慶寺荷花池

取採蓮橋港口五丈五尺採蓮橋取捧花橋一帶小湖五十

八丈

薛氏義門

在冷靜街提舉薛明道所居有宋建義門祠堂一所嘉靖志薛

氏舊居在張村宋時兩邁回祿而此室獨存人稱瑞室聞志

前族望表稱知衡州朋龜為一望安撫居實為一望刑部揚

祖為一望入元則提舉明道為一望共四望後族望表云義

門之後知灤州穰一望

薛氏有宅在張村有園在新莊然其湖上之城居則衡州以

來業已有之特提舉明道重修義門耳樓宣獻瑞室二字本

在張村其後失火而瑞室二字無恙移入城中結埼亭集

句餘土音南湖薛氏義門

四明談助

卷二十一

吾愛薛大夫孝弟充醢醬家以萬石雄居因十世壯小築浮

石莊善俗移亭障城居近湖南水村遙蕩漾雞蟲亦忘爭犬

貓或互餉有花成連理有木成交讓元氣所陶融和聲齊嘹

亮文孫克繼志華閥長無恙張村故瑞室吳回不敢向亦越

提舉時猶能新匕鬯同時推五老太守最頡頏西向望友恭

野處文在上謂汪太府友恭堂而今並消沉高門日淪喪但見新秦

小家子漫天披猖不可抗

薛處士唐

處士衡州之父贈朝議大夫著有田間集其田舍詩首二

句云世業存五畝家風守二南湖語宋註

知衡州軍薛公朋龜

字彥益政和八年進士歷官知興國軍奉祠除知衡州未  
上而卒寶慶志公有別業在浮石嘗爲五老會詳見浮石薛  
氏本傳

### 安撫薛公居實

字去華衡州之子也歷官守莆陽更起學宮遷提舉福建  
路常平茶鹽值歲饑救荒有績所在俱以治行稱自祠官  
召對除倉部員外陞郎中再擢淮東安撫使直秘閣卒於  
揚州著有薛安撫集十五卷耆傳

### 附錄詩一首

老妓自稱汴京宮人泣而贈之

薄粧自叙老深宮一曲悲歌聽不終黑髮尙沾梁苑雪素

### 四明談助

#### 卷二十一

二十

衣還帶上林風殘春柳葉蕭條綠破國桃花冷落紅收拾  
琵琶蹙眉黛教人同在淚痕中

### 薛刑部揚祖

字元振衡州之孫歷官知漳州以治行召爲大理丞漳舊  
有土城高僅五尺公至京師以修築請于朝遂詔守臣趙  
汝讜經畫如其言漳人賴之遷刑部郎中以疾請外得池  
州著有閩志編三卷耆傳公宰婺時東江流駛舟多覆溺  
乃創石梁捐己俸以先之樂助者衆費緡錢以萬計及守  
臨漳梁南江如東江之役故兩橋之成人皆以薛公名之  
爲之立祠示不忘也繫齋集墓志

宋同族紹興二年進士靖官縣令有南枝集一卷 掌機

宜文字循祖著映音一卷 乾道二年進士澄有家塾自藏六卷 嘉定元年進士師黠官縣尉有從政工餘一卷 紹定五年進士師傳官縣尉所著有雪蓑集 知縣琦所著有自笑編薛氏世風刪

湖語以孝弟爲醯醢愛瑞室之融融五畝世業二南宗風一門著述競爽爭雄薛氏瑞室樓宣獻公所書本在張村其城居在湖上二南之句見薛朝議

唐田間集中朝議之子孫有集者共二十六人四明五老衡州有名退耕浮石善俗以成靖康舊德少師齊稱王少師思溫薛衡州朋龜爲五老會首浮石在城西衡州

別業安撫持節蔚乎治行汴京老妓之詩宗國大夫之悲哽安撫居實有汴京老妓詩最痛刑部圖經流傳七閩漳浦保障之愛猶滿城闡郎中揚祖是雖顏柳之家風何多愧與

四明談助

卷二十一

二十一

四明五老宗正少卿王珩朝議將璿郎中顧文衡州薛朋龜大府少卿汪思溫宦遊畧相上下年俱七十餘最爲盛事顧文崇寧三年上舍魁湖語宋註

薛提舉明道

失其字元至治間官提舉有瑞室稿七卷同時官宣教郎同孫有甬東野人語四卷甬上耆舊傳

薛知縣觀

一名燾字景旬一字處靜先世聚族千指同居合食者五世號義門薛氏公少讀書強記爲詩文多不具草元至治三年以書經中浙江鄉試分教常熟遷杭州教授補沅江縣主簿攝令事盜息民安授丹陽令致仕著有學箕集三

卷成化志叅  
耆舊傳

司稅薛先生敬

字原禮宋進士朋龜九世孫也博學有重名至正中嘗典教象山遂謝歸以行藥自晦時稱退菴先生洪武初舉茂才授龍泉司稅卽引年致仕先生詩淡樸之中更饒高韻所著江天集子孫傳其業世有作者耆舊傳

紀善薛服耘

字濟美洪武己卯舉于鄉歷官趙府紀善所著曳裾錄十卷濟美集三卷耆舊傳

薛灤州穰

字有年宋知衡州朋龜十一世孫也少資性過人好問學

四明談助

卷二十一

二十二

天順壬午舉于鄉授涿州知州親問民所疾苦力爲療之三年改知灤州灤當孔道不煩而事集歲苦河決築長堤以捍之遂爲永利以請老歸里所載橐中裝不入私室置產與昆弟共之散其餘貲於鄉旅力爲善行博學能文詩崇唐人書法學鍾王耆舊傳著夢刀集二十二卷薛氏世風刪

薛孝子淋

字文時學于余太史本聞性命之旨事父魁能順之於道母董氏被疾累年孝子昕夕侍側值省試輒謝不往母卒三年不御洒肉不處內與弟治自相師友怡怡無間一女弟適李惟勤早寡無子孝子憐恤倍至所居相去數里日必一往視更數年不衰聞志子晨有震川集鄞獻表稱爲高

士

薛馬湖治

號曲泉嘉靖辛卯舉于鄉歷官馬湖府同知公生平博古尤留心於經學所著五經發揮七十卷雜著八卷曲泉集十二卷在南中與楊升菴先生相倡和記所歷山川土物有杜陵風概耆舊傳

薛山人岡

字千仞少以事避地客於長安爲新進士代作考館文字得與選因有盛名千仞年八十集其生平元旦除夕詩爲一卷起萬歷庚辰至崇禎庚辰福建林茂之序之身爲太平詞客六十年名重天下亦盛事也晚年卒於里中耆舊傳

四明談助

卷二十一

二十三

敬止錄云萬歷間里人薛岡以山人著稱公卿間岡初治舉子業爲太守蔡貴易所取其母多穢行彰聞一時岡羞恨謀之太守力止之岡請不已乃治其母與所私一僧同荷枷於市岡因棄其家出遊二十餘年不歸學爲古文詞爲考庶吉士者代筆多中式所積踰數千金時冠進賢者目不識文章正格岡以最劣之筆爲一時所宗所著有天爵堂集自序其父年三十不舉子及母有孕父夢一織屨者鬚髮皤然揖曰吾苦行數十年今將爲君之子但編草屨施千人數足則至矣詰其期曰千屨約二十日可就父寤而喜因計老人能爲吾子盍焚屨以分其勞詰旦徧覓草屨市肆得五百祝於所居傍之三官廟焚之越十日而

生岡父初覓履時或曰近里某道人多餘履使人往則道人以病手屨曰吾欲滿千以施於人無售者人還報父異其與夢中語合走領之卽所見夢中人也大驚遺之飯道入雖病猶能強飯及岡生道人卽於是日死矣  
天爵翁著述有甬東薛氏世風刪薛宗伯三省爲之序畧曰從子千仞最長於風謂不可當吾世而使遺風抑遏不揚迺次其世千百而掄什一詩凡百六十有五首作者凡二十有六人以予所覩聞曾大父行學博士公俊及諸兄文學晨參軍昇典客量諸姪文學岳皆多風而散逸未易採以近推遠其不傳者或尚多譬之廣莫扶搖殆不可一披襟盡收益足徵吾世之大也

四明談助

卷二十一

二十四

明同族 三才萬歷丙戌進士工部尚書謚恭敏 三省萬歷辛丑進士禮部尚書謚文介 玉衡萬歷己未進士工部主事俱見鄞獻表後遷居定海入定海籍 二尚書傳俱見四十六卷鎮邑名賢下

薛高士士珩

定海人  
傳附

字長嶼號白榆故國甬上巨族于定海首推薛氏尙書恭敏文介二公以同產並登一品時推名臣而先生恭敏公長子也最稱佳公子內行尤醇篤恭敏之卒聞訃勺水不入哀毀骨立祖母病中思朱櫻適非其時尋卒先生歿身見朱櫻不食同里邵尚書輔忠奄黨之魁也或與相見有問則答否則竟席無語論者以爲不惡而嚴國難旣作方

嚴開薙之令無賴之徒乘此告訐而先生終歲以大布之巾蒙頭盛暑不去其園居卽在城北正未嘗入山入林以晦迹也晚年點盡經史以課子弟海上方多事先生爲世臣風波不及焉所著有白榆集

鮎埼亭集

句餘土音擬薙露詞

長蒙頭

薛高士杜門

吾賴長蒙頭寧復事應酬底事親勞王江州江州不我尤吾復戴吾頭

詩話高士終身不薙髮然仍居城中杜門而已夫嘗遠引避地亦一奇也於時有令君排闥入見之感其苦節慰問而去

四明談助

卷二十一

二十五

葛觀察第

在冷靜街義門薛氏之東廣西按察副使葛仁美城居第現今門額尚存子孫散處不一葛氏世居小溪高尚宅世傳俱列高尚宅下

宋尚書范公祠

今祠在沈相府後

工部尚書范公楷

范尚書故第在萬齡見聞志

字子式嘉定元年進士與袁越公韶爲同年生越公尹臨安公方褐選吏部年已六十語越公求一近缺以便養尋當告歸越公不答密薦於丞相改臨安府教授遷宗正丞歷官至工部尚書在經筵因事啓沃邊疆州郡關乎朝政者知無不言李全據淮安反狀益明時相不能決猶委曲

掩護大臣諫亦不納公上書曰賊全猖狂恣睢舉朝皆欲殺之獨丞相隱忍不發昔郭子儀爲中書令考於史傳閒居爲多今彌遠獨當國柄二十二年所在窺伺危機一發變不可測遂忤旨去位明年除寶謨閣直學士卒於家志成今南湖范氏皆其後一云三鳳坊范亦其後

### 黃侍郎第

縣治東南二里冷靜街禮部侍郎黃宗明所居聞志侍郎以後遷于廣濟橋其第尚存傳俱列于廣濟橋黃氏下

### 細湖

城中雙湖其始但稱南湖錢公輔衆樂亭序可攷也其後乃有西湖之名而割長春門右一帶爲南湖因以西湖爲月湖

### 四明談助

#### 卷二十一

二十六

南湖爲日湖矣南湖之中又自採蓮橋取捧花橋一帶五十八丈爲小湖嘉定間圖可攷也小湖卽細湖舒中丞誤以西湖皆名細湖非也蓋由西湖而南湖至細湖爲最深處結埼

亭集

### 競渡湖

競渡湖卽開元寺西之小湖也昔有鍾黃二公競渡於此故後人名其處亦呼爲小江里又曰沿江里也乾道經圖

### 捧花橋

南達浮木橋北達龍舌尖俗稱三角地水道通倉橋河

全謝山湖語節直抵城南同流異浦則又別有奇焉試與子

原地望于小江之鄉正譌舛于句章之土別稱爲小江東湖者蓋以城中安東鄉

句一章帶曰小江里因名或乃混于訪昔人之遺跡求二豪之故

所競渡湖是也彼其分清洞以左旋如捧花之嫵女引脩

渠以斜行盼夕陽以延佇由長春門而入為清洞橋也為捧花橋所捧何

花芙蕖容與中有蓮心清芬一樓翠蓋亭亭以迎紅雨湖南水道

取象蓮花以延慶寺為蓮心島

### 日湖世家

在細湖盡處湖尾左繞門臨捧花橋街明初周贖菴先生授徒之所後為周氏世居舊宅已燬門前石鼓尚存今有新庄遷來周氏居此將蔣園廟前湖塘佔出丈許從竹湖轉北河口又有張姓兩岸佔出後當整理

甬上族望表南湖周氏先浮石北郭之周而顯贖菴先生禮

### 四明談助

#### 卷二十一

二十七

所卜居也或曰即宋四休先生之後春坊司諫冕一望乾

隆間周氏後人邁亭自云非四休之後

贖菴先生周禮

字吾學性剛介絕俗嗜學窮研經史每感歎時事輒于詩文發之援筆即成不煩意匠晚年授徒日湖之上惟以講學論文為事他無所聞因號贖菴耆舊傳子爰咨國子博士

聞志

### 司諫周公冕

字汝服贖菴從弟也十三補諸生訓導徐和仲授之琴輒善琴比長玩心字學梅竹山水遊戲翰墨之事亦無不習一日父謂之曰若非所謂玩物喪志者乎遂盡棄所習而

務學焉永樂六年貢于鄉會徵天下文士纂修大典郡中以公應詔歷遷右春坊司諫日侍講筵每朝退未嘗一語及朝廷事因號曰納菴年三十八歲被譖誅死仁宗卽位首念舊臣遣使驛召公長子庭授鴻臚署丞給俸讀書嘉靖志

### 禮部郎中周公濂

字汝清司諫公季弟聞志作從子世居日湖伯仲自相師友經

史百氏無不淹貫嘗總修郡乘及會修大一統志歷官精

膳清吏司郎中著有芝蘭詩稿三補耆舊傳

### 訓導周先生序

字文彝號味墨膳部濂之子有詩名以辟薦授本郡訓導

## 四明談助

### 卷二十一

二十八

詞家謂先生詩氣體高妙在當時能離然自出耆舊傳

### 周處士普

字德施號守拙司訓周先生序之子也爲詩有父風耆舊傳

### 高士周文學人龍

字伯鱗號彭蠡晚年更字倓生汝清公五世孫博極羣書每與同里屠長卿沈嘉則汪長文輩觴詠勿輟生平好購異書有家藏許丁卯詩版者屬其子謂此奇物不可失寧薄吾木以易之可謂嗜古好奇之至矣三補耆舊傳

### 周處士于度

字殷明文學人龍之季孫性孝友淹通經史後避地莊溪不競仕進嘗誡子姪謂爵祿不足榮惟飭倫紀立名節庶

幾無忝箕裘也

三補者舊傳

孫海字靜瀾雍正甲辰舉人已

酉科聘福建同考試官

曾孫仁宸字卜安諸生好學能

文無機械心不事生理而玩世不恭家貧善飲興之所至

雖與輿隸爲伍不屑也著有邁亭詩稿 元孫孝瑩字炳

耀名諸生現今食餼邑庠向有先代遺照冊帙并名人像

贊留存歲久剝蝕炳耀重爲裝裱珍藏于家

南水門裏河

一自桂芳橋直入進倉橋歷褚家橋

簡要志稱家廟橋

通普照橋一

帶河又自褚家橋側北入爲前所河今北入之迹已湮尚有

一綫溝渠故迹直進內有一池今名腰帶河頭是也有陳御

史宅

敬止錄

四明談助

卷二十一

二十九

聚福廟

縣治南二里蔣金紫巷傳稱茹家花園之神

嘉靖志

舊傳爲爻

家花園廟

開志

有傳神爲范少伯俟考

敬止錄

今在冷靜街北左

瀕河右達採蓮橋大街前對日湖世家廟左過河卽蔣金紫

巷道光三年修造殿宇祠下林君廷鰲新建後殿供奉金紫

大夫蔣公牌位將全太史祖望所撰蔣園廟碑記錄于懸額

以存古蹟有傳神爲范少伯者虬壇語也

蔣園

王亘和太守遊園之作

採蓮橋下路皂蓋拂雲來塵壓隨軒雨風生避暑臺酒緣佳

客盡花爲使君開憂患西溪舊相忘此日杯

自注滑州西溪常陪尊俎

湖上有蔣園卽金紫所築在採蓮橋王亘陪明州戶部遊蔣園詩有云採蓮橋下路皂蓋拂雲來是也成化志以爲將作所築蓋攷之未詳

結埼亭集

蔣園廟碑記

結埼亭集

城南競渡湖之支流爲小湖西爲竹湖有廟焉蓋宋金紫光祿大夫蔣公浚明之園神而後遂以爲里社之祀故其巷曰蔣金紫巷其水曰蔣家帶其橋曰蔣家橋其東有坊曰連桂亦蔣氏物也吾鄉里社之神多出自前代巨室之甲第園亭歲久遂享民之祀如握蘭坊廟以趙公善湘第中所奉坊神寶奎廟以史公守之宸奎閣中之閣神梅園廟以樓氏園中梅麓之園神蓋不可屈指也昆明歷劫文獻脫落遂有妄傳

四明談助

卷二十一

三十

而蔣園訛而爲茹園以字相近茹園又訛而爲殳園以音相同也蓋自南山東沙去古未遠已有此失于是橋名改爲殳家橋而廟名則曰茹園廟不知吾里中之世家自宋以來歷然可考並無茹氏殳氏猶幸蔣金紫巷蔣家帶之名未泯及自明中葉以後始稱曰聚福乾隆戊午湖上賢者葛君木人留心考古予爲據舊聞以告之嗟夫故國世臣喬木蒼蒼蔣氏之爲此里重者多矣而里之人莫之知則前此圖乘之失也蔣氏自唐時實由天台來居奉化已而遷湖上金紫爲豐清敏公所薦士官尚書金部員外郎抗疏排新法被斥將謫遠州以母老清敏力爭之而免金紫之子中奉大夫璿宣奉大夫琬最有名是時陳忠肅公來鄞金紫卽遣二子事之未

幾成進士忠肅爲書連桂二字以表其坊中奉知江陰歸猶及與潘公良貴倡和三江亭上其詩至今尚存而宣奉以忤蔡京自劾去師傅家學俱爲不負蓋蔣園之取重于里中者正以此不徒以踞重湖之勝也嗣是以還太學存誠爲慈湖先生講學之友聞歌有省德性清明金紫少子琚之後也尚書峴以閣學重臣事穆陵有弭變大功雖其少年不無物議而晚節可稱宣奉之後也將作主簿曉鴻文博學宋亡守柴桑之節杜門不出尚書之猶子也其餘登甲科列仕籍者前後相望故清容謂吾鄉士族之最先者有四而蔣氏居其一有三徑聯珠集有續三徑聯珠集七世志幽之文盡出巨公之手則當日園中過從之盛可想見也然蔣氏先籍奉化其

不可闕者更數百世而遙無復訛傳之患矣抑是禮也推而行之詎止蔣園廟爲然哉因卽詮次其語復之

句餘土音南湖蔣金紫公園

詩話金紫本籍奉化遷居鄞湖上七世清德不知乾道開

慶延祐至正四志何以不立傳

元祐遺臣傳碩學金紫遣二子師事了翁並成進士咸淳故

老重清門謂將作雖然連桂崇坊杳尙有聯珠舊徑存蔣氏有三

徑聯珠集樓宣獻公爲之流澤未湮衣帶水誰人妄改謝公

墩蔣園神廟今誤拂雲皂蓋經過地指點荒祠細討論嬾堂遊園

也句

曹居士授徒蔣園

四明談助 卷二十一

三十二

曹居士說字習之定海人贈侍講粹忠四世孫以父孝先死李全之難絕葷酒婚宦終歲寓居僧舍後學問難亶亶不倦酬答生平無喜愠嘗曰絕人我則天理自著學者尊爲泰宇

居士戴帥初寓鄞有同曹泰宇倡和詩延祐志

湖語侍講有孫講經不窮註云曹侍講放齋曾孫泰宇授徒

蔣園

蔣氏園在河南宅在河北是書旣以山川古蹟爲經緯故

園宅分列兩處

四明談助卷二十二

錫山豚自王家墩過河先至冷靜街等處茲再從冷靜街北  
蔣園廟後過河至竹湖底起雲石其蔣園廟左之分水西出  
倉橋轉北經大廟小尚書等橋至水則亭入平橋河東出蔣  
園廟橋至龍舌尖西轉北經普照橋新橋握蘭廟橋廣濟橋  
再北行合平橋河來水同轉東出市中心橋漸向北入萬壽寺  
西河達大河雲石之脉自南來西至鎮明嶺河北至提署前  
河再北至提署後平橋河東至新橋河以雲石爲主先叙雲  
石次叙自南而西爲靈應廟爲晝錦坊爲竹湖坊蔣氏爲宋  
宣少師第爲寶雲巷李氏爲寶雲寺爲戒香庵爲鎮明嶺爲  
宋四賢祠爲預議呂思公祠爲預議慶歷五先生祠爲元季

四明談助

卷二十二

一

鄞縣治爲旌忠廟所有事物詩歌詳于後

雲石

雲石在鎮明嶺南二十餘步隆起土中逼近寶雲寺或云寺

以此名

嘉靖志

今寶雲寺之東南石起平地逼于道旁相傳每

天雨有雲氣蒙之故名其脉從錫山來融結于此

開志

雲石自

順治庚寅開出後歲久漸沒乾隆庚子邑諸生何承浩等按  
志所載得其處遂自釀金鳩工石復出因環石爲石欄特樹  
碑爲久遠計上覆以亭碑記爲孝廉蔣學鏞所撰明經張承  
炯書丹載錢志

郭中立鑣雲石歌

我聞仙人煮石不煮雲五色煉成天亦補更聞泰山雲凝一

寸膚澍雨崇朝徧下土是知爲山之石者雲之母也雲之父  
有雲變石亦尋常變石爲雲但賓主爲看戒香古寺東雲石  
盤盤以拒拒臥冷雲窩千百年世人題石等瓦釜由來殊質  
悲淪棄鬻向隣家營半堵塵泥隱現古復今抱得雲心終不  
腐五嶽真形篆方寸呼吸直遊通帝所正逢雲石開雲氣抱  
拜狂呼蹈且舞呼朋爲洗石塵蒙香醪百斛澆地腑惟歎彼  
雲石之英待人而靈吁嗟滄桑世局如雲變埋石千年化爲  
女將欲騰石于霄漢之間亦復浮空映碧若霞嶼足濯青海  
背負天噓氣成雲雲作雨江郎雲霧天地連三片茫茫在何  
處飛來峯前日影西大石起立仰而俯大笑維衛誠啞佛不  
能使石頭點頑石光成炬我今作詩洗雲石洗石爲雲行記

四明談助

卷二十二

二

取爲語顛生知不知啞女能言石應語

范香谷

兆芝

雲石詩

老石千年不受洗自甘晦迹頽墻底根委由來不易窺中應  
妙具邱壑理歎爾興雲出雨資如拳偶露風塵裡未許玩弄  
置之益盎前止堪煉取一片補青大

靈應廟

今稱大廟

靈應廟卽鮑郎祠也舊曰永泰王廟在州南二里半按輿地  
志云鮑郎名蓋漢鄧邑人漢鄧邑在鄧山下爲縣吏縣嘗俾  
奉牒入京留家酣飲逾月不行縣方詰責已而得報章果上  
達旣死葬三十年忽夢謂妻曰吾當更生盍開吾冢妻疑不  
信再夢如初乃發棺其尸儼然如生郡人神之立祠以祀梁

大通間有奴賊名益倡誘羣盜號奴抄兵寇郡邑官軍邀擊不勝定襄侯蕭祇爲刺史神忽見形因巫語祇願助討賊期之八月十三日奴抄果以是日至餘姚舟膠于江衆陷于淖潰潰如醉官軍悉縛之祇奏其異武帝遣增大祠宇唐聖歷二年縣令柳惠古徙祠於縣宋崇寧二年尚書豐稷奏明州鮑君永泰王廟額犯哲宗皇帝陵名乞改名靈應乾道經道今在西南隅晝錦坊東宋以來屢封忠嘉神聖惠濟廣靈王延祐志明正統間郡守鄭珞新之歲以九月十五日郡邑致祭開志重建靈應廟記尚書胡濙撰見郡邑志

考正府主廣靈王廟議畧

結埼亭集

三禮之祀其在地示惟社稷爲明祀後世有城隍則社稷之

四明談助

卷二十二

三

屬也吾鄉所稱廣靈王廟者羣祀以爲府主則亦地示者是矣而其所傳神乃鮑蓋不聞有忠孝正直之節而但傳其誕誕不經之爲不可解也前此大儒如豐清敏公袁正肅公皆爲之請加封加勅於朝而吾一日起而非之吾知其信從之難也然而神示之不可證以神仙則亦夫人而知之豈待吾之灌灌哉或曰是則然矣然則鮑神果何考予曰吾竊疑所謂廣靈者鮑全非鮑蓋也四明丹山圖詠註稱鮑全有聖德董黯有孝行並以爲甬上之地仙意鮑全者必其隱居不曜不言躬行足以追踪古之逸民舊德而後世失載其詳者也鮑全之行旣不甚傳而圖詠固有地遷之說因又訛而謂其龍女謂尸解謂飛昇皆由鮑全而影藉之則知庸妄人之愚

不足怪也今不患其人之果足當斯祀否而居然拾庸俗之語見之文章如危素所作廣靈王傳可爲發一大噓者矣

甬水菴

在靈應廟之後唐神功初鮑王託童歌自青山徙廟于此其歌云鄞水西流北接甬水給事之宅實吾之廬縣令柳惠古上聞請以甬水村楊給士舊宅更置王祠此甬水所以名庵也今俗名淨土聞志

湖語並湖甲第嵯峨尺五碧瓦朱甍更僕難數其最先者給事故廬猶傳仙塢今惠濟鮑王廟古稱用水村乃晉楊給事宅

鮑王廟初在鹿山唐神功元年神託東門鄉童作歌欲徙廟楊給事宅給事之子承奉郎宏道因捨父遺宅爲廟湖語

四明談助

卷二十二

四

宋註

晝錦坊

在靈應廟之右宋慶歷中王周典鄉郡時所立今大廟橋亦稱晝錦橋其居第在松島樓楚公晝錦堂乃其故址見湖語註

連桂坊蔣氏

蔣氏世居小湖之西南擬其地當在大廟後今猶稱蔣家塘甬上族望表連桂坊蔣氏自奉化來有與岳林異僧交者摩訶居士宗霸也其後金紫光祿大夫浚明始有名其子中奉宣奉大夫並受業陳忠肅公之門忠肅爲手書連桂坊以贈之而金紫故豐清敏公之門人凡三望南渡有楊文元公之

門人曰存誠有德祜遺民曰曉凡二望而尚書峴以史氏同里之累不列焉其子孫見後表問金紫巷之蔣氏湖上有坊曰連桂爲蔣璿蔣琬立考二蔣皆籍奉化坊在湖上似當在鄞曰是也慈湖先生作蔣存誠墓志曰蔣氏世居小湖之西南所云金紫蓋卽二蔣之父浚明以子累贈金紫光祿大夫今奉化縣北三嶺山尚有浚明之墓而中奉大夫璿宣奉大夫琬附焉蔣氏世籍奉化而居鄞最早清容所云吾鄞士族之先莫如樓袁楊蔣是也蓋唐末已居鄞其自丹陽來之蔣乃自宣和學士猷之後另爲一宗宋建炎降臣蔣安義自剡來又一宗浚明在奉化志中有傳蓋豐清敏公所薦士而清容作蔣曉墓志有云忠肅陳公謫明絕朋好俾子並師連桂

四明談助

卷二十二

五

以登則中奉兄弟皆尊堯弟子金紫之世學可知矣中奉有三江亭詩亦佳存誠則與慈湖講學蔣氏科名之盛在宋亞于樓史諸家諫議峴將作曉皆名人也

結埼亭集答葛木人問

又云蔣氏在寧有三宗其一爲宋金紫光祿大夫浚明之後自天台遷奉化再徙于鄞其一爲宋尚書學士猷之後自丹陽遷鄞其一爲宋元祐黨人之奇諸子之裔今慈水鳴鶴場之蔣也

蔣摩訶宗霸

摩訶居士周顯德初人爲人慈善溫謹口誦摩訶鄉人稱之曰蔣摩訶時岳林有布袋和尚摩訶心異之與之處逾三年一日同浴長汀摩訶視布袋背有目布袋曰吾爲汝

所窺當去矣吾以布袋贈汝俾子代代爲衣冠家布袋歸  
岳林坐逝葬封山後越帥遣介過蜀遇布袋道中介舊遊  
四明識之乃曰爲吾謝摩訶相見已近願自愛介歸至岳  
林以語摩訶摩訶曰吾已知之一日造城別親友而逝

曹志

本清  
容集

### 蔣金紫浚明

字彥昭先世居奉化後遷鄞遊豐清敏之門清敏因薦之  
上書論君子小人之道極愷切累官尚書金部員外郎力  
爭新法不便執政怒貶官遠謫以母老清敏力救得免陳  
忠肅來鄞首遣其二子璿琬師事之先後登進士忠肅爲  
書連桂二字以旌其坊璿仕至左朝議大夫琬以忤蔡京  
罷歸仕至宣奉大夫公以子貫累贈金紫光祿大夫詳見  
結埼亭集本傳并前卷蔣園廟碑記

### 諫議大夫蔣閣學峴

字伯見慶元二年進士歷右諫議大夫理宗端平初除殿  
中侍御史兼侍讀嘉熙元年五月都城大火時士民上書  
言由濟王之冤進士潘昉對策亦言濟王并及彌遠之奸  
諫議奏火爲天災何預故王且劾全大琮劉克莊王邁等  
鼓煽流言并斥昉性同逆賊語涉不順自是無敢言濟王  
之冤者議者多以爲黨於史氏後嵩之開督府與樞密李  
宗勉異議私請劾之諫議謂宗勉無罪臺諫耳目官豈受  
私請嵩之以書罪狀蔡範袁肅諫議言二人皆有用才不

可誣復特疏劾鄭良臣良臣嵩之所舉用也人始釋然嘗自言勿欺心勿負主勿求田勿問舍因號四勿居士官至刑部尚書以寶章閣學士致仕

續通鑑

### 將作主簿蔣公曉

字堯臣尚書峴之猶子初伯父欲以恩奏授京官力辭後登淳祐七年進士歷任邑宰有聲入爲將作主簿國亡不仕終日危坐所談皆宋季遺事閱金石刻最多故爲文勁正似之先世多名流往還詩文將作有三徑聯珠集樓攻媿爲之序子昭先又有續集黃晉卿爲之序

延祐志

湖語爲問南湖之士族有諸蔣之繩繩偉哉金紫高義得朋豐公門下共資嚶鳴力排新法荆舒是懲幸免遠竄縉

### 四明談助

#### 卷二十二

七

雲所爭了翁之來更相輸誠同心之蘭其臭共馨中奉兄弟共守師承尊堯正學連桂以登是以宣奉卒忤蔡京

宣奉

忤蔡京見清容集

太學早覺聞歌清明慈湖兄弟實所服膺

太學存誠

金紫孫也詳見慈湖所作墓志

諫議落落端平晚節何以銘心猶傳四勿

閣學峴卽宣奉後初年以論濟邸事不爲時論所予晚年當穆陵不豫有逆謀者閣學弭變功甚大而又力排嵩之

所當表其將作多聞摛詞清絕義熙以後甲子編集

將作主簿

曉三徑聯珠之唵七世志幽之作薦紳猶傳述也

### 蔣氏聯珠續集序

黃文獻集

鄞故多官族而傳世之久者稱蔣氏蔣氏之起家以太平興國初至寶元康定中而始大有累官金紫光祿大夫者其子當元符崇寧間咸起進士至大官世祿所逮且三葉

最後有起進士爲嘉熙言官者至刑部尚書最貴顯尚書之猶子亦起進士爲將作監主簿有名咸淳時此蔣氏世次之可見者也潛生也後弗及覩夫衣冠之盛過其家而訪焉則高文大冊散落已久所可徵者獨其詩而已宋三百年蔣氏與之相終始誦其詩而尚論其世流風遺俗猶足以概見豈可忽哉凡其爲詩斷自開禧以來有三徑聯珠集宣獻樓公旣爲之序將作主簿之子昭先復纂次其續集俾潛序之昭先今方以儒入官引而勿替蔣氏之世澤未艾後復有續集者秉筆之士尙不一書

#### 宣少師賜第

宣少師繒嘉定三年太學兩優釋褐歷官參知政事以嘗預

#### 四明談助

#### 卷二十二

八

史彌遠定策功卒贈太師諡忠靖 忠靖之母越忠定王之從妹以史氏之甥致位執政語見日湖訪古錄 湖語釋褐有坊宣大參之廣廈也註云由均奢橋直抵靈應坊而止皆宣少師之賜第宣係釋褐狀元

#### 釋褐狀元坊

均奢橋南嘉泰三年郡守黃由爲宣繒立

寶慶志

#### 寶雲巷李氏

李氏世居甬東大河橋自香河令芳馨建第于此今稱寶雲巷李氏至乾隆五十年間屋已燬基址尚存

#### 李香河芳馨

字德甫一字蘭亭萬歷戊子舉人授閩長樂令設法置學

田築長林金漆二湖士民沾澤再知香河縣轄畿輔定府  
庄頭橫甚公至悉繩以法強項之名震都下顧獨優卹庠  
序有貧士逋賦多逮之獄公每捐俸代償而脫之

三補者  
舊傳

### 李文學應運

字吉暉香河公元孫居家恂恂孝友至排難解紛大義激  
發不避艱棘文學有女兄弟二人俱早寡爲具薪米撫其  
孫俾致成立

三補者  
舊傳

子凱有傳見後

### 教授李雪崖先生凱

字圖凌號雪崖康熙癸巳科先生年二十一初應鄉試中  
副車自以功候未至竟不赴省至雍正己酉始再應試卽  
舉于鄉明年成進士授紹興府學教授先生少與范素園

## 四明談助

### 卷二十二

九

梧

交素園精于音律嘗出所作紅玉燕傳奇相示先生亦

擬寒香亭傳奇示素園素園自歎不及所爲文最工駢體  
官越中始作詩名越吟草晚年更揭程朱之旨輯學庸說  
文俱刊行于世惟駢體文在京時寓永光寺爲人竊去今  
遂失傳年六十二自紹歸里教學里中凡七年而卒平居  
最友愛女兄弟三人俱家貧每年各贍銀米沒身不衰季  
父歿後從兄弟俱幼先生以銀米按季給贍至各已成立  
乃罷給採李氏宗譜子鈞字蘊山纂修宗譜能紹先緒

### 李教諭琦

字谷薰號雲石雲石于雪崖爲三從兄弟少與雪崖相切  
劘故其爲文亦長于駢體屢試不利至乾隆庚午始貢太

學考充內庭教習期滿選教諭未仕而卒雲石爲人和平敦樸有古長者風著有畫脂集大學析義存於家子杜諸

生採宗譜

### 寶雲講寺

舊在縣治西南行春坊之東宋開寶元年高麗僧義通來傳淨土教漕使顧承徽捨宅爲傳教院以居之太平興國七年賜額寶雲爲天下講宗十刹之一建炎燬于兵越王史浩重建爲功德寺寶慶志嘉定十三年火重建寺與鄞之儒學相隣明宏治十三年有司徒寺于竹湖坊戒香寺遺址住持如璋新建殿宇方丈山門張文定邦奇爲記萬歷三十四年住持興美建維衛殿後圯國朝順治十年重建聞志

### 四明談助

卷二十二

十

### 傳道法師義通

字惟遠開寶初自高麗來名振中夏有異相頂有肉髻眉宛轉伸長五六寸南參天台螺溪義寂法師深會止觀之教復欲航海判明州錢惟治留之遂止焉福州漕使顧承徽捨宅爲其傳道之所曰傳教院法席大開延慶寺知禮慈雲遵式親得其傳太平興國間賜院額曰寶雲昭其祥也端拱元年逝葬于阿育王之陽侍御王伯庠爲塔記聞志

參敬止錄

### 梁職方寓寶雲寺

梁職方以樟字公狄學者稱鷓林先生順天清苑人居大興隕撫都御史夢澤之子崇禎庚辰進士知商邱縣尚未浹歲

竭力守城城陷自刎夫人張氏登樓焚死公在亂尸中傷不  
殊難民救之得蘓以失事下獄對簿頸中創痕斑斑得雪甲  
申南走至淮史閣部疏題職方贊畫軍事公以金陵方畧并  
防維堯議上廟堂不報卽史公亦是之而不見用也公見四  
鎮跋扈遂棄官隱寶應之葭湖兄以柵字仲木明經儻有  
經世才兄弟互相師友偕淮上力耕葭湖之田以自給丁亥  
仲木來鄞與諸豪傑遊歸謂公曰甬上多志士可往從焉公  
以庚寅至鄞大喜高都御史斗樞董戶部守諭萬戶部泰林  
都御史時對日相往還唱和辛卯九月二日夜坐高都御史  
齋中盼翁州水戰信侵晨報至各慟哭絕而復蘇公在鄞首  
尾三年有八子唱和集萬戶部嘗手書之以癸巳還寶應又

四明談助

卷二十二

十一

二年仲木復來尋盟其後竟相繼卒自改步後距今未百年  
而八子唱和集已莫有存者夫人殉後縞衣嘗形見商邱人  
爲立祠

續耆  
舊傳

附職方贈無學上人詩

辛卯秋過明山憇寶雲刹無學上人以蘭若榻我愛其立  
心澹峙穆穆神遠遂度三秋瀕行留贈以訂異日三山雲  
鶴之緣

三秋鶴夢滯禪關暫逐孤雲物外閒清梵曉鐘分夜讀寒松  
遲日下明山香涵優鉢龍初臥戶種冬青手自刪片枕好留  
衡岳月石梁橋古苧衣還

戒香菴

縣治東南舊爲尼寺在竹湖坊唐大中間建名白檀宋大中祥符元年賜戒香寺額熙寧間有維衛佛現啞女身而爲說法鑄銅像事之明初寺廢宏治間徙建寶雲寺于其址超靈修復結菴以存舊蹟聞志啞女化後瘞於南郊柳亭菴節錄曇噩啞女傳見柳亭菴下

銅像緣記 畧

戒香寺銅佛像者不知何代有也惟本寺老尼法智傳言此像乃先師歷代供奉祖述遺語昔有人迎置寺云某廣東人舉家事佛一日天時晚忽有總角女子負銅一包到家言欲鑄佛一尊貌欲似我送去浙東明州府戒香寺供養言訖而去家人置于堂中桌上次曉但見此銅化爲佛像在桌貌似

四明談助

卷二十二

十二

寄銅女子無異因覺是佛神力自行現化于是如其言詢送至此卽考鐘伐鼓奉延瞻禮顏貌儼似向日本寺啞女也信知維衛佛自行設化無疑矣自宋以來經燬者凡四唯有銅像于煨燼中不壞茲因佛像出處恐逾久而失其真故述其概書之傳後云明宣德四年三月三日寶雲講寺住山法宏

撰 全文載敬止錄

鎮明嶺

郡治南一里許高五尺下有石脉自錫山來宋天禧中守李夷庚浚清瀾池以其土益嶺卑薄壯縣內案山之勢其後往來者憚于登陟漸削以磬石焉 聞志

黃南山僉事以鄞脉出于錫山至桃源次于崇法寺岡入

南門歷鎮明嶺此一定之說至云直抵候濤山而止則大不然按候濤山之與鎮明嶺中有大江界斷何能至其處謝山謂自南山以來皆守其說此則守其說者亦不能致辨也

近有謂鎮明嶺之豚自月湖花嶼過者若然則必先經月島月島爲今花果園廟處廟後卽河其地甚狹脉欲北上如何轉身月島之南爲王家墩其地甚闊瘿瘤橫生作何安頓且山脉進城皆朝府治勢必自南向北若從花嶼過河雜亂無序矣

袁菊村

士元

鎮明嶺詩

一嶺坡陀鎮四明無山無水自天成閒看來往登瀛客彷彿

四明談助

卷二十二

十三

金鼇背上行

鎮明菴

在鎮明嶺宋天禧間守李夷庚以土培嶺爲佛亭嘉定十三年火次年市民重建紹定元年守胡榘書園通道場以表之顏頤仲感大士夢撥田拓舊元至元十六年至大二年火隨復敬止今廢

鎮明嶺廟

在縣西南鎮明嶺上祀六邑城隍之神

錢志

正學祠

在鎮明嶺上東向明嘉靖三十年提學副使薛應旂郡守孫宏軾建奉祀宋正學四先生歲時郡邑致祭薛提學題祠額

曰象山正脉且爲之記記載聞志

寶謨閣學士楊文元公簡傳見後

禮郡侍郎兼侍讀袁正獻公燮傳見鑿橋郡學右袁氏下

通判舒州賜直閣學士沈端憲公煥傳見月湖竹州講堂下

通判宜州舒文靖公璘傳見後

楊慈湖先生簡字敬仲慈谿人父庭顯刻意爲學程督之嚴及于夢寐舒文靖嘗云吾學南軒發端象山洗滌老楊先生琢磨老楊者以別慈湖也慈湖先生中乾道五年進士授富陽主簿陸象山九淵道過其邑先生齒長二歲問答有所契遂師事之朱文公爲常平使者稱公學有爲己工夫薦之先是丞相史忠定浩亦以公薦歷知饒州樂平縣興學訓士欲使

四明談助

卷二十二

十四

邑人皆爲君子常曰學者孝弟而已矣時有古今道無古今性無古今聞者興起寧宗更化知溫州首罷妓籍尊賢敬士勢家第宅障官河卽日撤之城中躡踊名楊公河遷駕部員外郎轉朝散大夫金人大饑來歸者日數千萬邊吏臨淮水射之公曰薄海內外皆吾赤子卽日上奏哀痛言之不報會疾請去理宗卽位進直學士終寶謨閣學士大中大夫卒年八十六歲諡文元曹志

碧沚講學記見第十八卷慈湖書院記見四十五卷

舒文靖公璘字元質奉化人補入太學張南軒棫官中都公往從之有所開警又從陸象山九淵遊改過遷善日有新功朱

徽公熹呂東萊祖謙講學于婺公徒步往謁之以書告其家曰

敞床疏席總是佳趣櫛風沐雨反爲美境舉乾道八年進士爲徽州教授徽習頓異丞相留正稱公爲當今第一教官司業汪達首薦之知平陽縣郡政頗苛及公以民病告詞嚴義正守爲改容秩滿通判宜州卒公樂于教人嘗曰師道尊嚴璘不如叔晦若啓迪後進則璘不敢多遜淳祐中特謚文靖

曹志傳互見四十三卷奉化學下

### 附文靖公後人珽

白湛淵名珽在月泉吟社中變姓名爲唐楚友不知其爲吾鄉舒文靖公之後也生十齡而孤隨母養于白大德家因蒙姓白號湛淵庚子任毘陵教授剡源勸其援范公例復姓未知果否然要爲吾鄉添一詩人鮎埼亭集跋月泉吟社詩其

## 四明談助

### 卷二十二

十五

### 語本剡源集

### 呂忠公祠

正學四先生祠之東將別築呂忠公祠後未果

### 大愚呂忠公祠堂記

鮎埼亭集

忠公司庾吾鄉其至以淳熙壬寅去以丁未凡六年時諸先生多里居慈湖開講於碧沚沈端憲公講于竹洲絜齋則講于城南之樓氏精舍惟舒文靖公以宦遊出忠公之來其于諸講院無日不會也甬上學者遂以忠公代文靖亦稱爲四先生而滕德粹<sup>璘</sup>爲鄞尉朱文公語之曰彼中有楊袁沈呂可與語也蓋忠公之于吾鄉諸先生同道合德有如此忠公之官爲司庾故不得有所設施但傳其屏去倉中淫祀一事

深寧志之四明七觀而是時正甬上奎婁光聚正學大昌忠公以明招山中父兄中原文獻之傳左右其間其功無所見于官守而見之講學忠公之集雖不傳然猶散見于永樂大典中讀忠公吾鄉之詩弔景迂之祠式清敏之里求了翁寓齋之遺想見一往情深乃自元迄明以至于今無有以溪毛薦及忠公者是則甬上文獻之衰可爲長太息者矣禮于釋奠之禮必求之其鄉之先師不然者別有合也今甬上之先師楊袁舒沈其人可謂盛矣而愚謂當以忠公合之以其同時講學于鄞久並列於先師之座無歉也忠公之子喬年端憲壻也亦賢者能守家學應得從祀於是諸生議於四先生之東別築忠公祠堂而乞予志其事於石

四明談助

卷二十二

十六

忠公傳見月湖竹洲講學堂下子喬年克守家學孫寶之定居於鄞明四川按察使和其後也傳附後

按察使呂和字克中宏治十二年進士知臨淮縣歲歉發公帑貸種以賑助之毀淫祠四十五所撤其材葺新公宇僧尼悉還編籍改建平俗喜爭訟公案其豪黠不可化者窮治之奸惡斂戢歷陞山東按察僉事有王尚書弟倚勢殺人當道莫敢誰何竟致之辟卽誣公下詔獄久之始白遷陝西副使

進四川按察使被論落職

嘉靖志

王深寧七觀故國下車喬木蒼蒼理義雨露名節風霜古之遺直曰豐清敏排奸詆奄讜論廩廩託興荷花聞者斂衽

豐清

敏稷慶歷師儒燕及孫曾曰樓宣獻斯文統盟有德有言旣和

且清樓宣泗沂絕學闡自關洛朱張呂子緒承先覺臨川一

陸自得于心若異而同爲己功深淳熙四儒探蹟性淵並游

三先生之門獨契陸子之心傳舒文靖璘沈端憲煥處則講

貫以淑艾仕則善教以昌言長庚曉月惟楊暨袁袁亦有子

受業於楊進禮退義家學用光春木芑兮高山仰止人固亡

而書存世未遠而道邇顏何人哉希之則是宋註春木芑兮

慶歷五先生書院

謝山先生將建慶歷五先生書院于湖上先爲之記節錄于  
後

有宋眞仁二宗之際儒林之草昧也當時濂洛之徒方萌芽  
而未出而睢陽戚氏在宋泰山孫氏在齊安定胡氏在吳相

四明談助

卷二十二

十七

與講明正學亦會值賢者在朝安陽韓忠獻公高平范文正  
公樂安歐文忠公皆卓然有見于道之大槩左提右挈于是  
學校徧于四方師儒之道以立而李挺之邵古叟輩亦以經  
術和之說者以爲濂洛之前茅也然此乃跨州連郡而後得  
其亦難矣而吾鄉楊杜五先生者駢集于百里之間可不謂  
盛歟夷考五先生皆隱約草廬不求問達而一時牧守來浙  
者如范文正公孫威敏公皆摳衣請見惟恐失之最親近者  
則王文公文公新法之行大隱石臺鄞江已逝西湖桃源尚  
存而不肯一出以就功名之會年望彌高陶成倍廣數十年  
以後吾鄉遂成鄒魯邱樊緼褐化爲紳纓其功爲何如哉嗟  
乎故國綿綿衣冠人物歷久不替終宋之代如樓如王如豐

如陳如袁如汪其出而搢拄吾鄉者必此數家高曾之規矩燕及孫子然後知君子之澤雖十世而未艾也五先生之講堂皆已不存卽鄞江桃源二席亦非舊址予乃爲別卜地于湖上而合署之睢陽學統至近日而湯文正公發其光則夫薪火之傳幸勿以世遠而替哉

### 元至正末鄞縣治

縣故在東北隅開明橋北元至大二年因廉訪分司署遭燬改縣治爲分司署皇慶二年乃徙縣治于分司故址其地在西北隅今衛署西軍器局故址至正末方谷珍據郡治爲行省而縣治與之邇遂命尹宋禮移治于行春坊在今縣學之西按至正二十六年修學記云先是徙縣治于學西隸學地

### 四明談助

#### 卷二十二

十八

一畝二十三步爲縣圉

聞志

### 旌忠廟

在行春坊東卽至正末縣治故址嘉慶二十年建

### 旌忠廟碑記

乾隆四十年十一月十日奉 聖諭飭廷臣查議前明忠貞之臣自甲申已謚外其有死守城池殞身行陣與夫俘擒駢戮視死如歸者皆無愧于疾風勁草卽自盡以全名節其心亦並可矜憐自宜稽考書史一體旌謚其或諸生韋布及不知姓名之流並能慷慨輕生者謚議固難概見亦當令俎豆其鄉以昭軫慰于是廷臣集議定祠謚爲殉節諸臣錄行天下薄海內外咸曉然於 聖天子如天之度所以宏獎人倫

表揚忠義者度越前代百王萬萬其時吾鄞自錢忠節張忠烈而下得諡者十三人自華檢討而下得與祀者若而人而吾邑因循日久祠宇未立無以克稱 上意夫有制弗遵非恭也居桑梓之邦而不以酌水奉承前烈非情也 文遊宦四方于揭陽則有郭忠節祠于松江則有陳夏二公祠皆同時得邀祀典者以錢張諸公忠烈昭著如此獨缺祀可乎既歸里乃與同人謀立廟而羅君文義首以千金應于是告于郡邑大夫哀集衆力卜地于縣學之右爲屋三楹祀錢張二公闢其前以爲門宮其後爲三室中室祀華王諸公同時死難者其非鄞產而死事在鄞者亦與左室以奉高節遺老與錢張二公同心者嗚呼諸忠之事烈矣然非遭逢 盛世且有

所諱而不揚而究其所以昭著顯赫事無勿彰者全庶常闡幽之力也今鮎埼亭集行天下天下皆知有琅埼南屏之烈而庶常無後爰卽其右室別爲戶以祔庶常之主其亦諸忠所樂與共歆裡祀者也廟旣成相與春秋釋奠以歌頌 聖朝敦崇忠孝樹爲風聲之至意庶幾頑廉懦立有補于人心爰題其廟曰旌忠而文爲之記其事時在嘉慶二十年九月望日後學黃定文撰

旌忠廟碑書後

余旣與同志建旌忠廟祀錢張二公而祔同難諸公及遺老之不忘故國者春秋奉祀維謹越明年有以張忠烈公全歸時有舟子同日正命而不爲立主以爲遺缺夫舟子誠義士

然姓氏不可考當時慕義而起斷脰穴胸之死不顧者不可勝計如張侍御守大蘭山寨部下五百人盡死無一降者惟三人逸去明日收侍御尸者此三人也而管江杜氏一門死者尤多卽忠烈所遣告糴部將爲降僧所劫問公所在部將投水死不肯言其從者又不言而被殺者數人此其義烈豈亞舟子而姓氏不存徒深仰歎竊謂此等當春秋時享其陰靈自當從二公之靈旗以受國殤之血食而無從立主者也若謂此舉有所遺缺則誠有遺者夫忠魂宜表而貞烈亦當崇奉滄桑之際吾寧烈士旣多烈女亦復叠見如監國魯王元妃陳守死舟山宮井小楊夫人華夫人死尤烈屠夫人大楊夫人皆以身殉其夫而忠烈公之夫人慘死鎮江謂宜于

四明談助

卷二十二

二十

後進中間設立神龕帳幙敬謹祀享而竟未克就諸君豈有意乎倘得合力成之以補其缺是則所厚望者也定文識神位次序錄

正室崇祀二人

明東閣大學士兼禮部尙書錢公肅樂 事詳潛龍漕本傳

明東閣大學士兼兵部尙書張公煌言 事詳郡學右張氏傳

左右側附祀四人

明尚寶司卿錢閣部公子兆恭 附見錢閣部傳內

明殉難閣部公子萬祺 附見張閣部傳內

明瓜里參將錢八將軍肅綉 見潛龍漕錢氏本傳

明殉難督師侍者楊君冠玉 附見張閣部傳內

後屋中室中龕同事殉難從祀二十五人附四人

明通判參督師軍事董公光遠 見西城董氏本傳

明兵科都給事中董公志寧暨子士駿士驤 見湖南董氏傳

明兵部職方司主事華公夏 見新排橋華氏本傳

明大理寺評事王公家勤 見家井巷王氏本傳

明監察御史張公夢錫 事詳四明大皎寨

明按察司副使監軍陸公宇焯 見湖西陸氏本傳

明監紀推官楊公文琦 見桂芳橋楊氏四公合傳

明兵部職方司郎中楊公文琮

明監察御史楊公文瓚

明都督府都事楊公文球

四明談助

卷二十二

二十二

明兵部車駕司主事屠公獻宸 見鑿橋屠氏本傳

明監紀推官董公德欽 見西城董氏本傳

明建寧兵備道僉事倪公懋熹 見桂芳第倪氏本傳

明諸生李公桐暨子 兵部 主事文昶文昱 見砌里李氏本傳

明工部營繕所所正戴公仲明 見桃源戴氏本傳

明吏部主事楊公思任 附見東門楊氏後無傳

明翰林院檢討錢公肅範 見潛龍漕錢氏本傳

明監紀推官錢公肅典 見潛龍漕錢氏本傳

明監察御史全公美閑 見湖西全氏本傳

明錦衣衛指揮徐公啓睿 附見錢忠介公本傳後

明驃騎將軍都督僉事張公廷授 附見錢忠介傳後

明義武將軍錦衣衛經歷戴公爾惠 見桃源戴氏本傳

明諸生施公邦焮 見寶奎里施氏本傳

明布衣杜公兆菡 見管江杜氏合傳

明諸生杜公懋俊

後屋中室左龕未同事先後死節與祀十一人附四人

明貴州開州知州黃公嘉窩暨子近袞近宸 見五臺黃氏傳

明江西參將袁公斌 見城西袁氏本傳

明監軍揚州府同知王公纘爵暨子兆麟 見菱池頭王氏傳

明湖廣寶慶府知府李公振珽暨弟振珽 見孝門坊李氏傳

明參軍揚州江都縣知縣周公志畏 見新莊周氏本傳

明吏部員外郎任公斗樞 見後傳

四明談助

卷二十二

明行人司行人陳公時 附見城西陳氏後無傳

明諸生趙公景麟 見君子營趙氏本傳

明諸生張公槿 見大方岳第張氏本傳

明布衣陳公聚奎 見半湖陳氏獻球合傳

明諸生陸公崑 見湖西陸氏本傳

後屋中室右龕非鄞產同事殉難與祀九人

明兵部侍郎兼僉都御史慈谿馮公京第 事詳四明杜畧寨

明兵部侍郎兼僉都御史慈谿王公翊 事詳四明大闢寨

明都察院右副都御史餘姚王公江 事詳四明杜畧寨

明參督師軍事漂陽羅公綸 即子木附見張閣部傳

明參督師軍事慈谿魏公耕 傳見後

明參軍奉化汪公涵 事詳四明杖錫寨

明參軍嘉善蔣公士銓 馮侍郎將附見杜畧寨

明都督僉事河南張公元 馮侍郎將附見杜畧寨

明前軍都督奉化黃公中道 王侍郎將附見大闌寨

此外尚有孫閣學嘉績熊閣學汝霖吳尚書鍾巒張閣部  
肯堂劉將軍勛俱翁洲殉難傳見末卷翁洲下

後屋左室左龕同受江上官苦節與祀共四十六人

明右副都御史巡撫陝西高公斗樞 見縣學前高氏本傳

明太常寺卿兼吏科都給事中莊公元辰 見大皎莊氏傳

明給事中晉光祿寺卿陳公士京 見城西陳氏本傳

明太僕寺少卿沈公光文 見櫟社沈氏本傳

四明談助 卷二十二 二十四

明大理寺評事林公時躍 見南湖林氏本傳

明太常寺卿晉右副都御史林公時對 見南湖林氏本傳

明行人司行人陸公符 見湖西陸氏本傳

明戶部主事兼經筵日講官萬公泰 見新街萬氏本傳

明戶部主事兼經筵日講官董公守諭 見江北岸董氏傳

明戶部主事董公德偁暨弟德偕德仕 見西城董氏本傳

明監紀推官楊公秉翥 見桂芳橋楊氏四忠傳

明福建按察司經歷王公雲龍 見家井巷王氏本傳

明戶部主事毛公聚奎 見城西毛氏本傳

明大理寺評事倪公元楷 見桂芳第倪氏本傳

明兵部車駕司主事李公文纘 見車橋李氏本傳

明兵部武選司員外郎高公宇泰 見縣學前高氏本傳

明中書舍人邱公子章 見邱隘邱氏本傳

明戶部主事除公振奇 傳見後

明太常寺博士壬公玉書 居家井南巷稱石屋王氏

明監察御史紀公五昌 見祝都橋紀氏本傳

明尚寶李公振璣暨弟都府都事振玘 見孝聞坊李氏本傳

明國博林公祚隆暨子大理評事宏珪 見孝聞坊林氏本傳

明監察御史林公必達 見西湖林氏本傳

明刑部郎中周公元登 見新莊周氏本傳

明監察御史錢公肅圖 見潛龍漕錢氏本傳

明兵部職方司主事錢公肅遴 同上

四明談助

卷二十二

明中書舍人贊畫軍務錢公肅采 同上

明通政使司通政使谷公文光 傳見後

明太常寺丞全公大程 見湖西全氏本傳

明禮部主事全公美樟 同上

明兵部職方司主事李文靖 見孝聞坊李氏本傳

明國子監學錄李文瓘 同上

明國子監博士潘公訪岳 見城西潘氏本傳

明工部虞衡司主事方公陞 傳見後

明行人司行人董公應遵 見西城董氏本傳

明吏部司務葛公士楨 見響巖葛氏本傳

明權巢縣知縣王公應玘 見戚浦曲樹下王氏本傳

明都司葉公謙 見北郭葉氏本傳

明都督僉事總兵官江公漢 卽子雲附見陸觀察事後

明御營都督總兵官張公立中 見槎湖張氏本傳

明金塘都司陳公肇域 見城西陳氏本傳

明鎮撫屠公鼎忠 見鑿橋屠氏本傳

李儀部櫛入京陷賊事林繭菴徵獻錄辨其誣宜補祀左  
龕

後屋左室右龕遺老及同事諸生與祀五十九人

明貴州思南府知府周公元懋 見新莊周氏本傳

明翰林院編修晉國子監祭酒葛公世振 見響巖葛氏本傳

明左春坊左諭德沈公延嘉 見王家墩沈氏本傳

四明談助 卷二十二 二十六

明尚寶司卿沈公光融 見採蓮橋沈氏本傳

明吏部主事孫公榮旭 附見迎鳳橋水氏傳後

明中書舍人陸公寶 見湖西陸氏本傳

明刑部主事晉兵部武選司郎中黃公鼎鼐 見五臺黃氏傳

明山東武城縣知縣陸公起元 傳見月湖掬花園下

明湖廣通城知縣周公昌會暨弟監軍昌時 見新莊本傳

明貢生參軍事周公元初暨弟元越 同上

明廣東順德縣知縣周公齊曾 同上

明貢生參軍事徐公鳳垣 見柴巷徐氏本傳

明諸生林公岳隆 見孝聞坊林氏本傳

明貢生參軍事林公奕隆 同上

明諸生李文純 見車橋李氏本傳

明諸生參軍事李公艱嗣 同上

明諸生參軍事駱公國挺 見泥橋巷駱氏本傳

明諸生陸公宇燦 見湖西陸氏本傳

明徵士參軍事宗公誼 見月湖宗氏本傳

明諸生高公斗權暨弟諸生斗魁 見廣濟橋高氏本傳

明諸生沈公士穎 見皂莢廟沈氏本傳

明諸生陸公觀 見湖西陸氏本傳

明諸生董公劍鏢 見西城董氏本傳

明諸生朱公金芝 見王家墩朱氏本傳

明貢生費公禕祥 見菱池頭費氏本傳

四明談助 **卷二十二** 二十七

明諸生朱公鈇 見王家墩朱氏本傳

明諸生參軍事李公芳泰 附見陳恭潔公傳後

明布衣參軍事傅公奇遇暨子監軍攀龍 見監橋傅氏傳

明舉人陸公山輝 見湖西陸氏本傳

明布衣參軍事鍾公鳴雷 見百丈街鍾氏本傳

明諸生聞公性道 見湖西聞氏本傳

明諸生周公容 見七里塾周氏本傳

明貢生陳公獻球 見半湖陳氏本傳

明諸生范公兆芝 傳附湖西陸氏詩社後

明貢生參軍事林公宏琦 見孝聞坊林氏本傳

明貢生參軍事陳公鳳圖 見城西陳氏本傳

明諸生戴公芑翁 見桃源戴氏本傳

明布衣參軍事張公尚燮 見槎湖張氏本傳

明布衣周公志嘉 見新莊周氏本傳

明諸生紀公歷祚 見祝都橋紀氏本傳

明諸生范公大捷 見城西范氏本傳

明布衣楊公秉紘 見王家墩楊氏本傳

明貢生參軍事王公家亮 見家井巷王氏本傳

明諸生參軍事李公凱 見砌里李氏本傳

明諸生參軍事舒公天福 傳見後

明布衣李公蒞 見孝聞坊李氏本傳

明諸生錢公光繡暨弟昭繡 見潛龍漕錢氏本傳

四明談助 卷二十二

明諸生張公嘉昺 見張村張氏本傳

明諸生錢公豹 見高錢錢氏本傳

明諸生董公隆吉 見西城董氏本傳

明諸生余公派 見大池頭余氏本傳

明布衣范公洪震 見察院前范氏本傳

明布衣丁公泰清 見普照橋丁氏本傳

明布衣朱公相玉 附見張閣部傳內

後屋右室祔祀一人

皇清勅授文林郎翰林院庶吉士全公祖望 見湖西全氏傳

附錄祭文四首 黃桐孫撰

祭正室錢張二公文

孤臣九死之心莫扶墜日 聖代十行之詔深恤遺忠恭  
承 綸綍之頒宜潔蘋蘩之薦惟 神畫江翌主浮島麾  
軍勵身世于滄桑幹乾坤之板蕩志同張陸在天籟十三  
世之靈事異宗韓亡國綿十九年之緒一呼而摧閩嶠三  
度以震吳疆風馬雲車頻戰怒濤于東海心城血路幾開  
半壁于南天碧血終理丹忱未折久蒙 盛典敢布明禋  
嗚呼返文山之骨燕市招魂收國子之元齊廷著節今則  
琅埼南驚羅刹西流空思表墓于他鄉幸奉崇祠于故土  
廟麗膠庠之右近接馨香時逢霜露之需同歸肸鬻衣冠  
漢相羣瞻舊日之儀型介胄殿遺共沐 興朝之雨露魯  
社則僮殤並祀卞家宜父子同登<sup>某</sup>等居梓里以仰精忠

四明談助

卷二十二

二十九

卜良日以陳俎豆春秋時獻與雙湖日月而俱長檐宇憑  
依偕泮水宮牆而並永敬奉侍從某某祔席尚饗

祭後屋中室先後殉難諸公文

睢陽雙廟與祀南雷浙右三潮偕驅胥種窮島之聲塵已  
杳崇祠之肸鬻宜通追溯先民同參義旅曰狂生曰君子  
首作股肱與畫江與翻城並塗肝腦考彼文山幕府無此  
抗節之奇例諸湘水國殤莫負招魂之意至若追謚則黔  
封守土開蹈義之先聲滇末從王表成仁之舊蹟火攻兵  
解碧血烟銷填石懷沙蒼憐雨殞旁祀則南楚悲風竊葬  
王琳之首西湖涼月同埋張憲之骸七日秦廷血眸已裂  
一坏吳塚俠骨如生凡我同心不分異地敢陳俎豆用薦

馨香萃忠魂毅魄于一堂奉桂醕蘭餚于千載敬告

祭後屋左室守節諸遺老文

丹心碧血既竭臣忠土屋柴車更徵士節念桑海窮塵之  
老多鄧林逐日之遺豈願保其餘生幸未膺于兵解嗟彼  
山披髮入海抱石沉何與興亡之數究之懸耳蒼天埋骨  
黃土奚關得失之林然而守栗里之田園不隨朝市裂西  
臺之竹石能泣鬼神故知一代之高風卽屬千秋之生氣  
某等採來蘋藻日月雙湖潔治几筵乾坤一席詩歌耆舊  
遙思警效交通祀近宮牆願與春秋並永敬告

祭後屋右室全謝山先生文

於維我公文獻之宗天實啓之篤生甬東學通經緯文婉

遷雄深寧東發孰繼其踪我公紹之發贖振聾日星耀外  
江河積中聲馳四海名達 九重讀書中秘學術彌充巖  
巖氣象不爲時逢獨翔逸翮閭里從容著述宏富後絕前  
空微顯幽闡不遺餘功吁嗟明季陽九厄期追仰前烈確  
守綱維畫江泣血同舉義旗死敵死法盟心不渝駢首數  
十千古同唏河山改色日月韜輝其或不二西山採薇孤  
踪高躅風雨離披在我而已不求人知惟我先生服膺拳  
拳旁搜博採遍求遺編或補志銘或播詩篇維彼死者生  
氣凜然惟彼生者苦志昭宣足補青史以慰黃泉茲承  
聖詔聿建忠祠遵公遺集羣祀于斯公而有知快慰所期  
並奉公靈配享堂西緬維諸忠昭鑒在茲嗚呼先生功昭

簡冊巨編鴻文遺餉後學一縷瓣香敬陳薄酌靈爽式憑  
來歆來格敬告

以上節義事實詳於各氏族本傳或合傳附傳其有里  
族未詳者錄於後

### 吏部員外郎任公斗樞

字一齋以明經起流寓粵東桂王監國授中書舍人遷員  
外郎孫可望專政置王安隆府遣兵監守王不勝其侮謀  
遣使告李定國入衛命閣臣吳貞毓撰勅員外郎林青陽  
翰林孔目周官前後奉使可望聞其事捕朝臣十有八人  
公以中書掌勅寶首及焉拷掠甚楚但自承終不引王乃  
以矯詔盜寶罪皆論斬其家人合葬于安隆北關之馬場

### 四明談助

#### 卷二十二

三十一

後李定國統師迎王勒碑大書十八先生成仁處乾隆四  
十一年賜諡烈愍

明史吳貞毓傳及  
殉節諸臣事迹

官爵名字從殉節錄鮎埼亭集桂國三忠傳任公斗樞作  
斗墟并稱王追賜卹典立祠公得贈太常寺卿所謂三忠  
者公及殉難御史余鯤起陳工部純來也

余御史事見醋  
務橋余氏本傳

陳工部事附  
見余傳後

### 通政使谷公文光

字電飛一字耐菴崇禎中累官魯王長史甲申扈王南下  
詔暫駐天台乙酉六月陳公函輝舉兵公參豫焉遣人至  
鄞約共事者遂奉王監國入越以潛藩舊臣論翌戴功累  
官通政司使上疏言臣官喉舌悍帥狂言戚畹私情無從

式遏何以稱職王是之而不能用丙戌從亡失道不及而還遂逃禪縱飲沉冥以老晚年跌坐有光從足指間出熊熊然自謂大悟同人皆賦詩贈之題曰瑞光寶笈然公亦不得志而有托非眞佞佛也

續者舊傳

### 參督師軍事慈谿魏公耕

雪竇山人魏耕原名璧字楚白本世胄少失業學衣工于茗上然能讀書有富家奇其才客之尋以贅壻居焉因成諸生國亡棄之交皆當世賢豪志圖大事與于茗上起兵之役事敗亡命走江湖妻子滿獄弗恤也久之事解乃與歸安錢纘曾居茗溪閉戶爲詩長洲陳三島尤心契之東歸遊會稽與張近道朱士稚交相得因此并交纘曾三島

### 四明談助

#### 卷二十二

三十二

稱莫逆山人又因此與祁忠敏家五公子理孫六公子班孫善公子兄弟自任以故國之喬木而屠沽市販之流亦兼收並蓄家居山陰之梅墅有別業曰曠園在寓山柳車踵至登其堂複壁大隧莫能詰也山人旣居其家得盡讀淡生堂藏書詩日蓋工然山人于酒色有沈癖一日之間非酒不甘非妓不飲禮法之士深惡之惟祁氏兄弟以其忠義故曲奉之每山人至輒爲盛陳越酒呼若耶溪娃以薦之而朱張數子復左右之久之山人又遣死士致書延平謂海道甚易南風三日可直抵京口己亥延平如其言幾下金陵已而退軍山人復遮道張尚書詩入焦湖以圖再舉不克是役也江南半壁震動旣而聞其謀出于山人

于是邏者益急纘曾以兼金賄吏得少解癸卯有孔孟文者從延平軍來有所求于纘曾不遂并怨山人以其蠟書首之山人方館于祁氏邏者猝至被執至錢唐與纘曾俱不屈死妻子盡沒祁六公子班孫亦以是遣戍遼左後以計脫出爲僧而諸子之破產結客也士稚首以是傾家近道救之得出獄而近道竟以此渡江遇盜而死己亥之役三島亦以憂憤而死真所謂白首同歸者矣山人既死山陰李達楊遷經營其喪甚方亦以是遣戍而錢唐孫治卒購山人骨葬之南屏其後改葬于靈應石人峯下立石曰長白山人之墓鄞人墓在湖上者楊職方文琮同以是年死而次年張尚書蒼水亦葬焉鄞人呼曰三忠之墓山人

四明談助

卷二十二

三十三

之居于苕上爲晉時二沈高士故山有息賢堂因名其集曰息賢堂集自言其前身乃劉公幹也粵人屈大均者不可一世獨心折山人之詩嘗曰平生梁雪竇是我最知音一日斯人死三年不鼓琴大均蓋嘗再從山人寓鄞其風

格頗相近云

結埼亭集  
墓版文

句餘土音擬薤露詞

若邪娃

魏山人挾妓

白衣君遊梅里得妓輒歡喜祁郎君日倒屣遍求若邪溪娃陪朱履踉蹌複壁登車去越女三千淚如注

詩話雪竇山人嗜妓祁公子班孫客之日薦妓焉時人多薄之不知其成就若此

諸生參軍事舒公天福

字五齊一字一新諸生亦嘗以督餉豫於江東之師者續耆

舊傳

王克軒三補耆舊傳稱高士舒文學天福宋文靖公璘之後會遭兵燹絕意進取及門皆名士如徐中丞勅其最著者高士濟困扶危有功不伐嘗曰施德於人而形諸口不如勿施之爲愈也其雅量如此長子泰字再芳一字月客諸生孝友爲鄉黨楷模爲文不受束縛詩詞體近六朝次子暢孫大綸皆名諸生

徐戶部振奇

通介道人徐振奇字可貞一字我庸少有至行呐然不出

四明談助

卷二十二

三十四

諸口而大義所在守之甚篤與錢忠介公善及起事江干先生忻然從之與倪仲晦至蛟門說王之仁而返之以戶部郎叅瓜里軍事迎監國于天台忠介將不次薦之先生固辭而止國亡遁入東錢湖之青雷山中棄家不一顧居廿餘年諸子前往固請乃反城東角巾方袍不與時貴接風日晴和扶杖遊城中之湖上經行之地雖婦女兒童皆知爲徐先生也時論以爲漢王彥方之流通介道人者先生八十後所自署也有通介集八卷藏於家續耆舊傳

方虞部陞

字南仲一字霞嶼諸生累遊遼瀋登萊諸幕府感慨東事多見之詩已而參豫東江之師以尚書工部郎掌虞衡事

丙戌後行遯以終所著龍威丈人集四十卷散逸殆盡續

舊傳

甬上三忠遺墨

陳恭潔公

平安家信六十七

弟良謨頓首二月廿後連有廿五六兩號家書付孫九如并宗海管家任瑞順寄數日前因真定有亂兵之變傳是流賊破了京城戒嚴隨後知是兵叛人心始定只是外解杳然兵餉無措屢傳諭旨向文武百官借助一次解都察院一百兩今又于浙江省七千數內派認二百兩急在燃眉尚無措處今差大老往各省勸借浙直等處乃原任大司馬張玉老

四明談助

卷二十二

三十五

也凡在外見任在籍縉紳俱要借助其數自以多爲上其名色亦不一或免罪或復官或納官納封其能多助至一萬二萬者或進爵或晉階或以子弟爲官 恩典甚厚在京見任各官俱已捐助過了捐助數少不在勸借之內要各舉堪借富紳無有舉者故爾差官勸借我一次助過六十二次助過一百今三次又要二百稱貸無門病中心如火焚身如臥甌以此舊病又不時舉發 君父如此焦勞時事如此孔棘臺班何官乃臥病竊祿何以自安見在告病求歸幸總憲先因奉 旨選差河南巡撫不論新舊疏內已說我患病情眞不堪選差三月初五具呈求代奏已批發掌道今只候代奏奉旨便可出京只是人頭債多尚無盤費倘得給價回籍又

作區處以我病勢遇今時勢度已量力不但不願做官雖欲  
做官實實的做不來了惟歸家杜門服藥尚可保殘喘待  
老母菽水我原無宦囊無產業此番在京負債甚多目下口  
狀比星符在京時又大不同了只是手下人少欠人用奈何  
京師安靜如故恐訛言亂傳慎勿輕信歸路水陸未定看都  
察院代奏消息如何又寄信不盡 三月初六日弟謨再頓

首 外久恩字一封寄星符書一封天保寄書二封○

書中抬頭

空一格叠字作兩點俱照原石刻清出給假之假誤寫價  
字原石刻于字外作方闌旁注當是假字亦照石刻清出

遺屬

殉難之官不應口言家事但我年五十六尚無子承繼事以  
家庭之禮論自屬嫡姪久樞但久樞係長兄長子別無餘弟

四明談助

卷二十二

三十六

不能專爲我後毛家外甥係胞妹之子第三甥小官向有成  
說劉星符第二子武官係妻兄弟之子亦曾議及恨我去年  
赴京時不早定此計今遺命並立三兒兄弟稱呼炤年齒我  
一生清白無宦囊薄田不多凡在納糧簿內者除賣造 父  
母墳塋并留祀田外餘俱三分均分內久樞一分不論執杖  
不執杖並與之 老母年高惟靠兄侄奉侍他非所及 崇  
禎十七年三月十九日手書遺囑

錢忠節公

文壇水火日甚一日自我而言割裂經義竄掇字句揚栩人  
間直可號曰盜誇然弟此言出口便攻擊刺射無所不至惟  
望吾兄爲狂瀾之砥柱耳循例乞一文宗自效亦可庶幾至

欲以扶衰自任非今日昌黎則何敢何敢他日萬一得之吾兄今日雅訓斷斷不敢忘也北行分手得嘉論便堪持贈何乃以儀爲乎以兄命不敢不領謹拜登并此誌謝 楊事尚未結局仇兄常例不敢忘也因小价俱他出未及送去少遲當如尊旨也 水功社長兄大人小弟樂頓首○何敢下疊兩點亦照

石刻原樣清出

張忠烈公

弟自奉 簡書還越雖投閒冷署亦每以馳驅往來矢石間否則代庖 制勅坐是失疎候問弟之罪也弟憂時冷眼濟世熱腸苟有利於 國家有益於桑梓無勿竭蹶以告當事縱未必盡爲吾鄉所知忽求無媿此衷足矣每想盟翁具大

四明談助

卷二十二

三十七

學問大經濟尚爾穩臥東山焉得不令艱難困鬪所以區區說項者不過仰藉 老伯翁一起支柱南天耳接 手教慰誨之情泉湧颺發謬及揄揚弟何克承此若夫盟翁鶴舉雞羣弟所素諗而復且抱膝長吟惟占風於白水真人更足羞投關抵壁一流昨見象老題疏首 尊銜殊增封事之色但因臚叙太繁晝老殊費平章再四與弟躊躇如盟翁業擬覆於謁銓時優授京秩此弟推轂鄙私蓋未拜 命之先遂有是議然疏列百位覆亦不上十人惟鹵一勳明兩兄同預此例它不及也部曹之 諭容再圖之發羽匆次率勒上報不文之誚統恃鑒在 弟名正具 左裕

右陳恭潔公遺札二錢忠節張忠烈二公遺札各一恭潔兩

札想見當時國步艱難貞臣心苦念及後嗣尤全忠孝忠節  
札作於太倉內召後尚在崇禎盛時惜未得其蹈海以後真  
蹟忠烈札無所寄姓名考之續耆舊集當是與林西明岳隆  
者四札向藏莪亭范氏忠節同望世華見之遺命其子付之  
貞石并模三公像於前而文爲之志嘉慶甲戌仲秋月里後  
學黃定文謹書

陳恭潔公有專祠在和義門娑蘿園內黃太學定蘭覓得  
石刻恭潔公小影一手札二暨錢張二公小影手札因并  
嵌于旌忠廟殿後磚壁上以便後人瞻仰亦美舉也定蘭  
字紉佩郡司馬定文從弟喜藏書校讐全謝山太史甬上  
耆舊續集收藏家詳畧不一紉佩擇其最詳明者互錄一

四明談助

卷二十二

三十八

部遇有鄴架罕見書無不倩人鈔謄甬上好古士也

旌忠廟祀全翰林碑記

鄴全謝山先生負鴻博之才能識其大者仕焉而已教於其  
鄉論譔前哲成仁取義致命遂志之事以垂不刊而錢忠節  
張忠烈二公尤其生平所樂道者也夫兩公丁亡國之餘不  
大宅天命崎嶇山海至於喪元湛族義不返顧洪惟 聖朝  
覆載同量憫其勁草之心勒諸史傳 錫以通諡學者聞二  
公之名思攷見其行事而諸家紀錄或隱約而不詳或牴牾  
而失實蓋殷頑廸屢明越之間筐篚竭於饋餼骨肉膏於鋒  
鏑室家毀於勦剿之株逮民人愁痛固已多口隕問矣而且  
將帥之跋扈士子之反覆同事者意見之乖違有覲面握手

而不能相告以心者百年以降傳聞異詞宜其日就湮微也  
先生官史館時得抽金匱石室之藏証以耆舊聞見於忠節  
別有神道第二碑降神記畫像記年譜引葬錄題詞崇祀錄  
跋於忠烈則有神道碑銘畫像記合祭文並案時論事鈎稽審  
覈而文筆足以達之然後兩公生平未白之志昭然光河嶽  
而揭日星不可謂非張中丞之韓退之段太尉之柳子厚也  
孟子言學所以明人倫朱子說中庸道其不行由不明故不  
行兩公行之而君臣之倫明於當時先生言其所以行而君  
臣之倫益明於後世其有功於名教甚大嘉慶二十年春鄞  
人士卜地學宮之西建祠祀兩公而以其後左之室奉先生  
祔食焉法施於民則祀之之誼也周官經大司樂掌成均之  
法凡有道有德者使教焉死則祭於瞽宗鄭康成曰祭於學  
宮中也先生於學則南雷蕺山之傳也著述則深寧東發之  
儔也其餘事爲文章平視攻媿剡源若清容所不屑道也古  
之所謂鄉先生者歟宜祀於學又不僅在表彰兩公矣王宗  
炎撰